



5

الطبعة

١٥

Selfie

العمل الحائز على جائزة ساقية الصاوي التشجيعية

أحمد

دار العلوم للنشر والتوزيع





# Selfie

## بالعامية المصرية

عمرو حسان



أسم الكتاب : selfie  
اسم المؤلف : عمرو حسن  
الطبعة الأولى : يناير ٢٠١٥  
تصميم الغلاف : أحمد فرج  
مدير النشر الأدبي : سيد شعبان  
التنسيق الداخلي : رفعت حسن سيد  
دار العلوم للنشر والتوزيع  
ص . ب : ٢٠٢ محمد فريد ١١٥١٨  
هاتف : ٠١١٤٤٧٦٤٠٠٠  
الموقع الإلكتروني : [www.dareloloom.com](http://www.dareloloom.com)  
البريد الإلكتروني :  
[daralaloom@hotmail.com](mailto:daralaloom@hotmail.com)  
[Facebook.com/dareloloom](https://www.facebook.com/dareloloom)  
Twitter: @dareloloom  
جميع الحقوق محفوظة  
رقم الإيداع : ٢٨٥٨ / ٢٠١٥  
الترقيم الدولي : ٧-٤٣٦-٣٨٠-٩٧٧-٩٧٨

دار  
العلوم  
للنشر والتوزيع

إن الآراء الواردة في هذا الكتاب لا تعبر بالضرورة عن رأي دار العلوم للنشر

يمنع نسخ أو استعمال أي جزء من هذا الكتاب بأية وسيلة تصويرية أو إلكترونية  
أو ميكانيكية بما فيه التسجيل الفوتوغرافي والتسجيل على أشرطة أو أقراص  
مقروءة أو بأية وسيلة نشر أخرى بما فيها حفظ المعلومات، واسترجاعها من دون  
إذن خطي من الناشر

الديوان ده مش شعر ولا نثر ولا حاجة خالص ، انما كلام  
مش مترتب اتقال عند دكتور نفساني ورتبته هنا ، اتكتب  
كله في الليل ، غالبته ف الشتا والخريف ، وبعضه ماعرفش  
انا اللي كتبته ولا الدكتور ، كلام عنها ، وعني ، وعنكم  
سلباً وإيجاباً ، وعن أصحابي ، وعن متلازمة البكا المسائي  
اللي دائماً تبتي بي مالـك؟ وتنتهي بي " مافيش " وعن  
حاجات تانية ، ، ،

قاللي " مافيش حاجة مالهاش علاج " ، اداني  
سيروكسات ١٢,٥ واندرا ل ١٠ وقاللي ابعده عن العصبية  
وركز في شغلك وهتكون تمام ، يومها قبل ما اروح قتلت  
اتنين صحابي في مواجهة بالكلام ، عاتبوني وفضحتهم  
فيهم ، ماتوا وماكانش قصدي ، ولحد دلوقتي لما باشوفهم  
باقرا الفاتحة واكمل مشي ، قولتله لو استمررت على كسده  
مش هيفضلي حاجة خالص ، قاللي اكسب نفسك واخسر  
كل حاجة ، بس . . . . . وعنها يامعلم ، مسكت القلم والورقة  
وكتبت اللي حصل بالحرف ، بالأوض المقفولة واللمض  
النيون والسرير والفتارين ونمر العريبات ، عارف!  
" الاعتراف بالحق فضيحة " في غالب الأمر ، يعني

هيعاملوك على انك سكران بتهلفط وهيصنفوك فاشل  
اجتماعياً ومنبوذ عشان مسلمها لقلبك ومش بتعرف تقتل  
القتيل وتمشي ف جنازته

الكتاب ده كمان فيه الشوية الحلوين اللي ف الحدوتة،  
اللي فضلوا من الصحاب، واللي فضلوا مع الصحاب  
بالعشرة والمعاملة

اكتشفت ان اهم التفاصيل في حياتي إلي جانب أمي  
وحبيبتى " بعد حذف أبوها " هي الأشياء البسيطة واللي  
عمري ما ادتها اهتمام، مثلاً انا عمري ما قولت للمج  
الفخار " شكراً " مع انه سايلي ذراعه طول الوقت  
وعمري ما بصيت فيه الا ودقت فرحة، جربت مثلاً تقول  
للتلاجة " بحبك " أو تقول لكلب الجيران " ربنا يخليك ليا  
وما يجرمنيش منك، أو تقول لفوار الحموضة " جميلك ده  
على راسي ليوم الدين " !!

ممکن تشوفوا جرعة الحزن كبيرة، انا مش عارف انا بكتب  
العمل ده عشان انا تخلصت من الحزن ده ولا بنية اني  
اتخلص منه معاكم، بس الأكيد ان المشاركة بتخلي النتائج

ممكنة وقيد التنفيذ، والواحد لو ما تكلمش ممكن يتحول  
باب أو فازه أو انبوبة اختبار، والطبعي ان الحزن يتحكي  
والفرح يتعاش . . .

ممم، من الأول وانا بقول بلاش تقديمات لاهتودي ولا  
هتجيب، اتفضل اقرا الكتاب ولما توصل لآخر صفحة  
استنى لحظة وقرر، لو انت ماحسيتش في الكتاب ده بأي  
شيء مشترك أو ماحسيتش اني كتبتة بالنيابة عنك وانك لو  
معاك القلم كنت عملت نفس العملة، سيبه فوراً واهديه  
لصديق من نفس سلالتى، او اسند بيه رجل ترايزة السفارة  
عشان متميلش بالأكل، او اعمله غطا للخابور، او سيبه  
ف البلكونة مع الكراكيب لحد ما يموت م الشمس

ملحوظة :

هذا العمل، يحاكي الواقع وأي تشابه بين أبطاله وبعض  
الأشخاص مقصود وموجه، ولا أنصحكم بتداوله، إلا  
بدافع الحكي والفضفضة، وبس

عمرو





، ، ،

لأبويا اللي كتافه جبال خير وعيونه سمار من طمي النيل

ولأمي اللي انتصرت ع الليل وادتني الحلم بدون تأويل

ولـ ليبي وحدوة ولشكيب ، ولبوبوس ولماـدو وموسى

ولإيمي ونادية ولشاهـندة ولكل بنات المحروسة

ولماـجدة وحكمت ونبيـلة . . أنهار من حضن ف توب

ستات

ولباسم يوسف ولقودة ولريم ماجد زينة الحلوات

وليدو ومعتز وحازم ، ولصفوت ولمروة قناوي

لهشام زكريا ورامي عصام وأمير يوسف وبقيت حاوي

ولكل الابيض ف الاشياء ولكل تي شيرت زملكاوي

ولسامي ف سجنه وكل شريف ، سجنوه من غير أي أدلة

ولكل مهرج ضحك حد ف عز مادـنيتنا مـمة

ولأروى وسيكو وللفرقة ، وكريم كوكو وامجد وريهان

ولها مجدي ومروة عرفة واخواتي ف كل زمان ومكان

ولتوتا ومجدي وعم غريب ولكابتن عبده ودربالا  
لمحمد جعفر وام سمير وشريف غالي سوني رحالة  
ولاخويا محمد وليتي ولأمّح واحمد آل صلاح  
وصلاح مرسى الراجل الطيب أبو شمس بتطلع كل صباح  
ولوائل عامر ولـ زينا لاحمد مختار وليحيي نديم  
ولحفني ومنعم ولـ حوا وعصام السقا وحرف الميم  
ولبكاليوريوس انا ما عرفهوش  
ولقرش حشيش شافني ماشوفتوش  
للجاي اللي انا عشته ف عقلي  
والماضي اللي انا لسه ما عشتوش .



ابص بقلبي لعنيها ، عنيها جماد ما يحنّوا أكلّم ربنا عنها ،  
تكلّم ربنا عنه !!

كل الحاجات الحقيقية لازم تستخبي من الناس ،  
هيتسهلكوها بحثاً وهيتكلموا عنها كثير أوي لحد ماتبور ،  
ما اعظم الضل ، اعمل كل اللي بتجبه من ورا الناس ،  
ماتعلنش عن متعتك للعام ، خبي تفاصيلك علشان تدوم ،  
اول ما هتقول انت بتعمل ايه عشان تكون سعيد هياخدوا  
اللي انت بتعمله ، في الأول هيجربوه وبعدها هيعملوا زيّه  
ولما يزهدقوا منه مش هيسيبوه إلا لما يفسدوه ويخلوه على  
كل لسان ويفرغوه من محتواه ، عشان كده اقعد ع القهوة  
بتاعتك طول عمرك من غير ماتعلن ، قابل صحابك ف  
قعدت نوستالجيا وفضفضة من غير ماتعلن ، وتحت هذا  
البند تندرج القهوة والاغنيات واللحظات الحقيقية ، في  
الزمن ده المبهجات بقوا يتعدوا على صوابع الإيد  
الواحدة ، ولو خلصوا هينتهي العالم وهنتحول كلنا لأرقام  
وزراير وتروس ومحركات ، تحبوا تتحولوا لمحركات !



مبدأياً

بُعدنا عن بعض أوضح ف النظر

والعزلة برهان النبي أول ما يخرج للجموع

قربنا من بعض أبعد من كده

والشبع ف البعد بس عشان نجوع

عن نفسي باقلع حزني ع البوابة واخرج

جسمي البديل / الحزن

اسود غميق

شايل هروبي م السباق المرف الدنيا

شايل بواقي الخجل من كل شيء

شايل سنابل ميتة

قبل الشتا

وشايلني فيه

ما اقدرش اشيله واطوحه لبعيد  
لان فيه صفة أبويا وضحك أمني وحضنها  
فيه العلاقة الوحيدة اللي فضلت من سبع طعنات واسم  
واعرفوا من غير ما اعيدها للأبد  
لما باحزن بابقى ناقص روح  
و اما بافرح بابقى ناقص جسم

من هنا وف عزلتي باكتب لكم عن قصتي  
بابعت لكم سلامات صحابي ف اغترابي  
كل اللي شهدوا ع الكتاب  
وسمعوا عبارات الوجد والشكر واللوم والعتاب  
واتمكنا مني في ليلة كتبهم ووزنتهم  
على قد جهلي بالميزان  
على قد علمي بالنغم  
ويقول لكم من عزلتي هذا الكلام :



## مشهد ١

جيل التمانينات، شركاء الحياة والموت، أكثر جيل ضحك  
وهو بيعط، العشر سنين الأوائل مروا علينا كأنهم طيف،  
حلم سريع، ما كناش نعرف اننا هنخلص حصة البهجة  
كلها بدري كده، لو نعرف كنا قسمناهم بالتساوي ع  
العمر كلهم بدل ما نخلصهم كلهم ف ابتدائي ونقعد نندب  
باقي الفترة . . .

سلام الله على الحارة الطيبة، بشكلها الكلاسيكي الغير  
معقد، بشبابيكها المؤمنة وتفاصيلها البسيطة وسكانها  
الأصليين، رمضان اللي بجد، الطبلية واللمه ع الأكل،  
الفولكلور والألعاب اللي كنا بنصنعها بايدنا، شكل  
اللبس، الذكريات الواسعة، الواسعة جداً قبل ما كل  
حاجة تبقى ضيقة، حتى الروح . . .

لكل الاشباح اللي خرجوا من اجسامنا لأزمان قديمة  
يتفرجوا على مسلسلات تاريخية ويلعبوا السبع طوبات  
ويعطوا بأداء جماعي ويضحكوا في المطلق . . . .

## المشهد

ليد خارجي، حارة الأقباط في شارع طنطا بمدينة الاسماعيليه

## موسيقى

مقطوعة "ربما" للتلاتي جبراه

## الاضاءة

أبيض ممتد، ضوء أزرق نأسي على وشك طفل أسمر

## ديكور

بيوت دور واحد ودورين، مشربية أحيانا وأحيانا شباك بضافتيه، عمود نور  
مافيعوش كشاف بس لو اتشال بضلم الشارع

## الحالة

نوستالجيا



باكتب لكم

عن طفل يشبهني

يشبه ابوه اللي كان غاوي السفر والطل

وكإنه مفتاح للسّمار بيطل ع الأبيض

عن طفل بيقود الكتيبة ف الميدان

ويفطّم الأفراح عن الأحزان

للطفل عين بتبصّ ع النور بانتظام

والثانية مقفولة انتظار للشرح

ينظر للبعيد بجنون

يعشق خروج الشمس من جيب المسافر

أو دخول البدر ع المينا بهدوء

يختل وزنه ف امتحان المشي على طرف الرصيف

ينزل ويطلع ينحني يثبت يقوم

يخسر معارك طياراته ع الرياح

يشكي همومه لنجمة ساكنة ف غرب بيتهم كل يوم

وسألت : هل كل أطفال المدن ييحبوا آخر العام؟

صورة ديسمبر لما يتحول شجر

ويهزنا بالليل؟

أولما كان بيوجه الأطفال لضوء مبهر غريب

ضوء الكنيسة ف انتظار العيد / يجوز

أو خطو بابا نويل

لحظة ما يدي الناس عطايا وينطلق فرحان

شجر الكريسماس لما يحتل المدينة بعنف

وينصهر فيها

ف الحواري

يسمعوا عن شكل بابا نويل

لكنهم مايسمعوش عن أمنيات بتتم

يتفرجوا ف السيما على أفلام بينزل فيها تلج

لكنهم ما اتفرجوش على تلج رطب حر خوفهم م الحقيقة

لحظة ما دق الجرس

خرجوا المصلين المساوف ايدهم البركة

هب الولد

شارك صديقه الأكل والمطر العنيف

كانت مظاهرة خلق ع الاسفلت

كان الصليب

بيص من فوق البشر زي السما الثانية

وجناين الأمطار بترقص للصور

وتشارك الناس انتصارهم

كان لازم الطفل اللي عيط بيتسم

كان لازم المجذوب يطبطب ع العيال

فيدخلوه ف اللعب وياهم

أسطورة قالت : إن مجذوب المدينة

هو بابا نويل

بيقضي طول العام علي الطرقات وحيد / لحد يوم العيد

كانوا العيال بيدخلوه ف اللعب وياهم

علشان يمد ايديه ساعتها يحقق الطلبات

كان لازم الشعر اللي ساكنه

ينفجر صاخب

وينخط أول اغنياته بحس طفل

يمكن تكون مازادتش يومها عن خمس كلمات :

ربنا ، الليل ، حبال الطيارات ، صوت الكناريا ، المطر

من بعدها جربت أقول الشعر وحدي

وعرفت إيه معني الخطر



كل اللي فاكره إن نجمة ف السما  
كانت بتسكن غرب بيتهم كل يوم  
يحكيها عن كل اللي تم ف ليل طويل  
عن ذكرياته البنت ف كتاب البراءة  
عن وردة شافها بتبتسمله مرتين سابقين  
وماكانش عارف ان كل البلكونات  
بتعيش حالات بالشكل ده  
وف كل بلكونة ولد  
بيص على نجمة بتسكن غرب بيتهم كل يوم

يشبهني جداً قلب هذا الطفل  
دمعه المفاجيء ، والمنظم ، والخبيث  
حبه الغريب للطائرات البوص  
لحظة ماتخفض وشها لله  
وكانها بتعلم الناس احترامهم للمقدس وانتصارهم بيه

موسي إذن ماوصلش للفرعون ف لحظة  
اليم كان مُرهق أكيد بتحاوطه إيد من ضي  
تملاه شكوك عن صدمته ف مقابلة الفرعون  
وكإنه بيمثل آماله ف ابراهيم  
وبيسأل الله عن ندى قبل امتحان النحر

يمكن عشان الرحلة دي ، وعشان جنون الشعر فيه  
انشق ليه البحر .

## خروج ضروري

الطفل دمه بيكنس الشارع ويرحل مش بإيده

والخوف إذا صيده وقع ف الأسر بيبيده

أطفال ضحايا الحزن قوت الظلم وعبيده

الرحلة طول ما السير طويل بتسير وراه

والأعمى يبطل نظر من صدمته من شيء رآه

أوقات بيان الحزن نور من شدته والضحك آه

والسكة بتغرُ الولد بين ضلعه ووريده

## {هامش}

أول كلامي لجديتي: أزيك!  
الدنيا معك غيورك بدون فرحة  
وحشني جداً كلامك ضحكك ليا  
جلايتك والسبعة والطرفة  
حجرك ياتينا اللي كان مفتوح على الدنيا  
حواديت ولعب وكلام أنا مستحيل انساه  
تصحي في نور الفجر باللحظة والثانية  
تقومي وتصلي وتقومي تبني حياة  
كنتي كباتك شجر وصل السما الثانية  
أو كنتي زي المطر نازل بأمر الله

وحشاني يا جديتي  
فيه كلام كثير متحاش  
كبر الأمير واتهنر  
واميرته ماقابلهاش



والديب هجم ع الغنم

مافضلش فيهم سوى

واحد ضعيف هو أنا

قر يموت قام عااش

الراديو لما اترمي عيطت يبجي يوميه

صندوق بحجم السما شايل غناوي دوريه

فوازيه وحلي وأمل بنوثة بصفيرتيه

وبراءة عااشت زمه ماتت ف غمضة عيه!

آخر كلامي لجدتي: سلامات

يا اللي انتي فوق انما لساتي ف عنيانا

عُمر النفر مننا مش كونه عااش أو مات

لكه بطول قعدته ف السيرة حوالينا

وحشاني يا جدتي، ماتكفينش كلمات

لكني لو هاسمك.. هاسم كذا جنينة

## مشهد ٢

أحنا اللي بيسمّونا الأقاليم ، بلاد فضّلت تكون دراع أو رئة  
على انها تكون الراس ، بلاد منزوعة الماكياج عديمة الآلة ،  
مفرطة ف البهجة ومختلفة ف اللهجة ، بلاد بتخبي الشمس  
ف كل بيوتها القديمة وتطلّعها كل يوم حبة حسب  
مزاجها ، لكن لأسباب ما أقدرش اطرحها لاني  
ماعرفهاش ، بنفوق علي ساعة فجر شايلين فيها أحلامنا  
وأهالينا وشوارعنا القديمة ف شنطة كبيرة وبنمشي ف اتجاه  
العاصمة كإننا مرتزقة ، ملعونة الأحلام يا أخي ، بتغرّب ،  
بتخلينا نمشي ف جيوبنا أصحاب زمان وأدوية الاكتئاب  
والوحدة ، علي أي حال " طوبى للمغتربين في بلاد  
لاترحم "

## المشهد

نهار خارجي، موقف أتوبيس الاسماحيلية القاهرة

موسيقى

أغنية "دورينو" لفريق ال مغني خاتة

الاضاءة والديكور

لا يوجد

الحالة

سفر

عن حلم نورس فات بلاده البحر

قاصد بلاد فيها النوارس خطيئة

مجرمة ف حق الأبرياء الطيبين

وبريئة عند المجرمين

فما أغربها

مجرمة . . بريئة

تحريك بروح الغلابة ف الطريق

وتقتلك بنفس الطريقة

على باب مدينة

أهلها بيناموا بعد العصر / جيت

سلمت على كل اللي شبهي

وابتسمت بكيت

على باب مدينة

أهلها بيعيطوا ف البحر أو بالبحر أو للبحر

بصيت ورايا



شفت المدينة بتسلم عليا عند كارتتها

وقالت لي : آخرتها .

نفضت شريطها /

وفرطت ضفירתها

وسابتني اشوف كل اللي سييته ف الطريق

ف الطريق

برتقان بيطل من حجر البيوت

زي العيدية ف اختبار الفجر

عازف سواحلي من رجال السمسمة ف المقاومة

بيقدم استعراض مؤثر للي من بره المدينة

وبقوة فراشة

كان بيرفض أي خمسة جنيه يكرمشها الغريب

ويحطها ف ايده

بحر بيعيط محار ويكح موج مالح

توتر على الكورنيس

باسميه الهوى الأول

أو انتصار الفولكلور علي موجة التحديث

ف الطريق

تقدر تقول الأغاني بلهجة خاصة

خاصة جداً

يعتبرها الناس غناك المفرد الجمعي

أو نشيد لخروجك المعلن من الصلصال

تقدر تبص من البيوت الضيقة ع الراحلين الصبح

وتشوف ف عينهم شيء

يخص الغربية

والرحلة

أنا كنت زيك زمان

بانظرلهم من عين بيوتنا الضيقة

ماشين ف حضن الفجر قاصدين المفاجأة

بيدوروا على شيء مايعرفهوش

وكان سرب من الطيور

مختار بلاد مابتديهوش سبب المجازفة

حط العجوز ايده على اكتافي:

- حافظ نشيد الراحلين الصبح؟

- أيوه

- غنيّه

ماتقولش ضاق بينا المكان

قول ضيقنا بيه .

وكعُرف مش عارفه

كان اللي راحل م المدينة ف اتجاه الضوء

بيترك قلبه ف الامانات ويمشي

وكان مطب

واقف ببيكي ع اللي خرجوا م المدينة بعد متر

والمحصل

بيبّص ف وشوش اللي خرجوا ببطء

وكأنه بيعلم وشوشهم علامة

يقدر إذا فاتت سنين

يوجدّها بسهولة

قلت :

لوقمنا بحذف ال " ك " من كلمة هناك

هل كانت " هنا " هتشدنا؟



هل كنا هنرضى بالأغاني الموسمية؟

باللجوء لله علي شط القناة؟

بالصور ف ألبومنا؟

بالدبلة الدبارة ف كف بنوة؟

هل كنا؟

هل كنا هنصبح ميالين للشعر مثلاً؟

الشعر أفراحنا وأحزاننا

إعلاننا للأحداث بكتماننا

جلابية الفقرا اللي انا منهم

الشعر بالنسبة لسواحلي كل مايملك

الشعر والنوة وفراق محتوم

هما اللي ممكن يحنوا ضهره هناك

ياحزن السواحلي

لما يمشي ويدي ضهره لموج يطرح ملح

يا حزنه لما ينشطر نصين بعاد

ويخلي قلبه بين بينين

وكانه ف الحالتين بيمد روحه للسفر

ويهز قلبه ف لعنته

خدم السواحلي كل شيء

الا اعتزازه بلكنته

وماتسألوش عن موت هيبجي ف الطريق

أو ليل هيطرح فجر مش مفرح

وماتسألوش لو قلبه ف الرحلة اتنفض

أو زاد سعة

لو كانت الغربية اللي داقها مرعبة

أو ممتعة

بس اسأله : ليه الشُّنط

بتحب تهرب من أصحابها وقت حزم الأمتعة؟ .

دلوقتي خارج للغريب

خارج وفايت كل شيء :

شكل أمي /

والمطر بينافس الدمعات ف عينها كل ليل

وبترمي روحها للتاريخ والذكريات

حزن جارتي

لما تقريباً بتفضل واقفة ساعة

حين ما يبجي الوقت وانزل ف الطريق للشغل

فتعيّط غُنا

وتفضي نص إزاة البارفان على هدومها

وتخرج قبل ثانية من نزولي

فماتلاقينيش

دلوقتي خارج وفايت كل شيء

موسم المالحجة / جنون السمسية

بياعين الجمبري ف السوق / رقة الكروان ف عز الفجر

خضة القاعدين ف نادي الشجرة وقت القطر مايعدي

شكل الخديوي ف الميدان

سكة الاستاد

.....

وغيرها

مسحت دمة نزلت من عيوني ع المطب وقلت :

لو افكرت انساها

مش هانسي افكرها .

خروج ضروري جداً

خارج وسائب دارك المليانة بيك

هتسيب لمن أمك هناك من غير أبيك

والبيت إذا عدته غريب هيكون أبيك

الأرض واسعة ورحلتك مليانة نوح

وسفينتك المليانة جوز ينقصها نوح

جسد بيخرج م المكان وفايتلي روح

ودموع خروجك من هنا مسقية بيك

{هامش}

تَعْرِفُ تَفْرَحُ؟

بَاعْرِفُ مَاخَرَنَشْ

تَعْرِفُ تَضْحَكُ؟

بَاعْرِفُ مَايَكِيَشْ

تَعْرِفُ تَبْغِي؟

بَاعْرِفُ مَاانْدَمَشْ

تَعْرِفُ تَحْكِي؟

بَاعْرِفُ مَا اِدَارِيَشْ

مَالِكُ؟

خَافِ

لِيَهْ؟

مَشْ عَارِفْ

مَشْ عَارِفْ اِيَهْ؟

مَشْ عَارِفْ اَحْيَشْ

(سفر بشكل ثاني)

باكتب لكم من عزلتي

عن صاحبي صياد السمك

ساعة ماقال :

ف العمر كام ثمانين سنة يستاهلوا ننزفهم

ثمانين سنة ف حجر الشوارع والبيوت

تعرف ، ،

كنت عايش ف البلد دي

لما كان الليل بيحي في أي وقت ويتفرش ع الرمل

لما كان الموت بيظهر للفدائي زي ضله

كنت واحد م اللي مروا ببطء ع الشاطيء وغنوا

م اللي قادوا النار وفاتوا الدار

غصب عنهم

أو غصب عنه



ليّا حاجة ف كل حاجة ف البلد دي  
كل دكة . . . ليا فيها ساعات من السرحان  
كل ناصية حارة فاكراني بملاحي  
قبل م الزوار يعلّوا ف البنا  
قبل م العمدان يزيد طولها خمس أمتار  
وتعجز عن إضاءة حي باستمتاع  
حجر البلد دي يتسع لكثير ولو ضيق  
واسألني عن حجر المدين وحفاوة الأتباع  
كل اللي عزل منها مش منها  
وصدقني كل اللي باع اتباع

المنطقي / ان اللي عاش تمانين سنة بيصاحب الموج والقنابل

لما يبجي يموت ، يموت على شطها  
المنطقي ان اللي قضى حياته يعزف سمسمية  
لازم يموت وف حضنه حاجة منها

الغريب ف الموت مهارته ف اختياره للنهاية  
الطبيعي ان مثلاً لما ابويا يموت  
يموت قاعد على الكرسي ف ايديه جرنال  
بيصع الأخبار ويشرح لي الفروق الضيقة  
بين السياسة والقمار  
أو ف ايده اللايّ مايل ف اتجاه الشمس بوصلة  
وف عينيه نظرة تأمل للطبيعة  
مش يموت ف الفجر باصص للممرض  
والمذيع الداخلي بيصحي كونسولتو العناية . . . . للنهاية  
إن جاري حين يقضي نص عمره ف اختراع الفرع  
أو ف الرقص من باب المجاملة للجيران  
لما يبجي يموت يموت على صوت آلات النفخ أوع الميكروفون  
مش يموت حاضن طبق ف بلاد غريبة  
موتة الجرسون

باسأل عليك ف اليوم عشر مرات  
فينك يا ضل البرتقان وحفاوة المانجة  
مارس بيجي كل عام يسأل عليك  
قلت لعيون عيل سألني ع الغنا :  
ان الموسيقى

مش مجرد شيء بيوهنا السكون  
هي أكبر من كده بكثير  
يصحبنا صوتها ف اللقا الموعود أو ف الفراق  
ف الخلاف والاتفاق

تخرج معانا م المكان وتطل بينا ع البعيد  
صوت الموسيقى كان بيخرج م العجوز  
يرسم حدود أبعد لتغريد المدينة  
دمعته ضحكته

زي ليلة من ليالي شمال حزينة

هل كنت باحلم لما شوفته بيتسم على ضفة الكورنيش؟

ساعة ما قال لي :

قد ماتعيط هتضحك

قد ما تسلّم عينيك للبحر تسلّم

يااه ، من غير غناك تعرف

فشل القمر ف الرقص ع الشرفة

وقفت بنات المدارس ف انتظار السر

ف انهزموا

من غير ماترقص بعد فوز الفرقة بالدوري

كل اللي دخلوا الاحتفال حسّوا انه ناقص شيء

على أي حال

يكفيك وجود عيّل سماره بيجمع البحرين

وبيخلط الضدين

يكفيني صوتك

وانت بتبيع السعادة للمشاة

كنت أول فرد يسحب م الوداع صك اللقا

وانت أول فرد يصنع

أرض أصفى من سماه

من هنا الكورنيش؟

يجوز

من هنا البلاجات؟

يجوز

قال لي :

من هنا أول طريقة للحياة

{هامش}

عم أحمد مات :

الصباح العالم صلوا عليه في مبني الأوقاف

كان واحد من الناس التي انبسطوا

ومشيوا خفاف

من الناس التي اكتبت بالجاف

عم أحمد كان راجل سكر

وعجزو قلاته

تعصر مخه يتزل حواديت

تعصر قلبه / يدلق نسوان

لكه كان طيب برضه كمان

وعياله غلابة ومحازة تعيش

خال وايمانه

خال / كان طالب في الجامعة

انا على ما اسمع، طالب في الدفعة الثالثة علوم

عم احمد كان يضحك ويقول :  
 ده هيطلع ايه.. يملكه بلعوم!!  
 اضحك / يضحك / يتنابه سعال  
 يهدى شوية ويشرب ميه.. أحيه يا حيال  
 ده الواحد عجز مش دريان  
 كانت بنته ايمان معهد سنين  
 والحاجة مراته ادلها سنين مابتتحركش  
 اما سألته عيانة بابه  
 قال : مايخصكش  
 وزنقني ف خاة اليك وقال : اشرب ياخفيف  
 علي قد مايبياك متسلط  
 علي قد ماكان مع جوه نضيف  
 عندنا ف الحقة مافيش انسان  
 الا وعم احمد يوعي عليه  
 ويقولك انا هنا مع ياما  
 مع قبل الوالة ماترزق بيك  
 مع قبل مافيه عقلة صابح تطلع ف ايديك



عم احمد كان عم الطاولة

ومالوش مسئلة

ومحال تعرف هتفاجئه منه

بيجيب أجلك في مسافة مايشد الجريه

كان يشبه مصر في تفاصيلها

فرحان وحزير

طيب تعرف

المكنة بناحته اما اتوقى

مايقنش تدور

حتى النظارة اللي لابسها بشنبر مكسور

لو واحد غيره يجريها

مايشوقش النور

عم احمد مات

وفهمنا حاجات ساعة موته

فيه ناس بنشوقها مانعرفهاش

غير لما تموت

وسيرتها تدور على كل لسان

وقتھا بس بتعرف اصله

وتعرف اهله

خاله وایماه

وتقول بینک ومایبه نفسک

مشه کتت حضرتته و خدت بایده و عیدینا!

فی حاجات بتباه جوه عینینا

مانحسشه بیعها الا اما تغیب

والفازة بتکسر اصلاً منه خیر مانسیب

الفازة بتکسر اھمال

والناس بتموت طمعاً ف سؤال

عم احمد مات

وفتحلي مجال

کام واحد عایش ف الدنيا وما بنشوفهوش

کام واحد میت نال یدفه عالم مماتوش.

### المشهد ٣

أول حب ، الكم اللامتناهي من السذاجة المنظمة ، الظهور  
الأول للدرينالين بشكل غير مدروس ، ضربات القلب  
السريعة والرعشات الخفيفة الحقيقية ، أول حاجة ف كل  
حاجة ، الخيال الوردي والبراءة المطلقة ، التوتر البيولوجي  
العجيب ، الهزيمة الفادحة بعد أول فراق ، الصور الكثير  
اللي ماينفعش تتوصف أو تتقال ، الفترة اللي بتتربط في  
خيالنا بأفلام أو أغنيات أو مشاهد غير مرتّبه ، الارتباك  
لأول مرة ، البهجة اللي بتخلينا نغسل الأطباق وننصف  
أوضنا ونعدل براويز الصالون ، الفيلم القصير جداً اللي  
بنترعب واحنا بنكتب نهايته ويكون أول حرف ف  
متلازمة القرب والبعد ، وأول خطوة ناحية الاكتئاب  
المُزمن

المشهد

داخلي ليك (غرفة)

موسيقى

طيري يا طيارة ل فيروز

الإضاءة

أزرق سماوي، خلفية أحمر قاتم

ديكور

غرفة غير منتظمة، دولا ب مفتوح، كرسي خشب قديم، مكتب صغير،  
ورق كتير

باكتب لكم

عن بنت واحدة طيبة

هي اللي قدرت تخطف الشاعر

وتكمل اللوحة اللي نقصت لون

كانت بتشبه قوس قزح

لحظة ما يصبغ طرف فستان الصبية

وينطلق مكسوف

قالت : كإن المطر ما عرفش غيرنا يا حبيبي

تفتكر ممكن ف ليلة صيف هنتفارق؟

كانت إذاعة ( F.M ) بتبتدي الإرسال

وبتبتدي فيروز صباح الجمعة زي النور

أوزي صاحبي ما قال عليها / موسم الغفران

" طيري يا طيارة طيري يا ورق وخيطان "

كنا ف ليلة صيف ليلتها

كانت عندها بتحوي شيء مجنون

والشارع المرهق بيعرق ليل وخوف وسكون

فردين يمشوا ف آخر الشارع

يفصلوا الأغنيا عن ضحكة الفقرا

ويمزجوا الشعبي بصوت فيروز

يمكن يكون الركن ده

موقع إلهي للتحرر والتواصل

هنا

قالت باحبك واختفت

هنا

سألتنى عن عشق البنات

وجاوبتها هل في بنات أصلاً ف هذا الكون سراكي؟

ضحكت هنا

وورود خدودها لونت خلفية الشارع هنا

أول دخول بصراحة ف الممنوع هنا

آخر دموع تنزل فرح كانت هنا

هنا كل شيء كان بيننا كان

بس الليلا دي كل ده ما حصلش

أمي اللي يومياً بتقطع ورقة ف بلوك النتيجة

سألنا باستغراب : هل حد قطع ورقة بتاريخ النهاردة؟

قلنا مش فاكرين

بس الحقيقة رفضت أقول السر

يمكن تشاؤم من فراق هيكون

أو خوف لا أقابل إتهام بجنون

أو سيل معارضة

الحقيقة اني اكتشفت الصبح

ان النتيجة ماكانش فيها ورقة بتاريخ النهاردة!

كان كل شيء يقول هنتفارق

كنا ف ليلة صيف

قالت : باحبك

بس مش ممكن نكون فردين على نفس السفينة

نزلت دموعها بانسياب يوجع

واللمبتين فقدوا البصر فكأن نورهم ضاع

كانت إذاعة (F.M) بتنهى إرسالها

فيروز ف نفس الوقت ختمت

بنفس اللحن والإيقاع

" بدّي إرجع بنت صغيرة "

وف عينها شفت السفينة بتكمّل نزول للقاع .



## {هامش}

المكان: وسط البلد في القاهرة

أما الزمان فمع زمان

قصة حزينة مؤثرة

والقصة دي كان يا ما كان

بنت بظفيرة ومريلة

ومادام في بنت ف فيه وله

بيئص م الشباك عليها لما ترقص ف الخلا

منحكتله مرة منحكتلها

حبّت حكايته وحبها

حلفوا انهم هيكملوا

كانوا كل يوم ييمثلوا

روميو وجولييت والقدر

سافرت ف رحلتها الطويلة  
وهو ما باليد حيلة  
كان كل يوم يجمع لعبهم ف الصالون  
واهلكه شافوا ده جنون  
منه يوم ما سافرت قوس قزح  
بقي ناقصه لون  
المكان : وسط البلد في القاهرة  
أم الزمان ف حالياً  
نفس المكان علي قهوة بلدي  
قاعد حزينه مسترخياً  
كوباية شاي واتنبيك جنينه  
وقميص كارهه مكتوب عليه  
انا حبيبتك.. سيبتيني ليه؟  
عدت قصاده وشبعنت  
وبعد حبة انتبعت  
ان الزمان غدير كثير

مشك هو ده نفس الأمير

ولا هي طيره

أيد منك مع واحدة غيرها

وهي حبت حد غيره

وكع سجارته ف الهوا

دخاته رسمتهم سوا

أنيك صغار بنت ولد

الحلم مات لما اتولد

منه وقتها والقاهرة

زحلانة منه وسط البلد.

باكتب لكم

عن شاب يشبهني

عاشق هدوء القصيدة ورقة الإيقاع

يرقص على الخيط الرفيع

بين شعوره بلذة المشوار

وخوفه من عيون المارة وقت غروب

الشعر عند القاصدين الشعر / لوحة

واقفة ما بين حالتين

إما بتستر أو صريحة

والشعر عند الممنوحين الشعر / لقطة

مفضوحة حتى غموضها

أوغامضة بفضيحة

تقدر تقوللي يعني ايه الشعر؟

قلت :

طعم أول رشفة ف الشاي بالقرنفل

لما يصطاد البنات الهربانين م المدرسة

ويزقهم على رحلة السيما والرقص ف الطريقة

شد آخر ورقة ف بلوك النتيجة

وشعورك المرهق بعام فايت وعام هيطل

أو صحبة الحلوة اللي تمت سبعة من شهرين

وبقالها مورد شبه ثابت

من تجارة الفل

أو.....

ايه؟

تقدر تقوللي الشعر ايه؟

كان شاب يشبهني

بينهي علاقة بدأت وانتهت ناقصة

كان يمكن الضوء الخفيف

والأغنيات الناعمة سر وجوده وياها

- بتحبني؟

- ما عرفش

بس الأغاني الملهمة كانت بتبدأ من هنا

قلق الصواب ف السلام

أول ما اشوفك كل حين

قلبي اللي كانت تقسمه الطواحين

لحظة ما اواجهك بشيء كان نفسي اقولهولك

- بتحبني؟

- ما عرفش

عارفة التعود ع الموسيقى الطيبة الناعمة ،  
وبراعة القديس ف لمس المخطئين بشوئش  
صوت المؤذن لما يوهبنا الأمان ويشدنا للصبر

- بتحبنى؟

- .....

كان الصراحة الجو

لايق ع الفراق

برد انتصر بجنون علي الأشياء

أمطار بتنزل باضطراب وهدوء

والليل بيوصل منتهاه

كانوا ساعتها

كل واحد ف اتجاه

بيصوا من على قرب أبعد ما يكون

والمشهد الناقص يكمل

زي ما اختاروا

هل يرجعوا حبيبين

بيفصلوا اللقطات بشوقهم

أم يكذبوا كذبة (صداقة بعد حب)؟

إحترت

واحتاروا

دخلت ف شارع جانبي

وانساب ف شارع جانبي

أول ما حسوا بانهم ما انهاروش

إنهاروا.



ممکن تكون علاقات بهذا الحجم هي الشعر .

أو يمكن يكون الشعر ضوء خافت

لست كفيفة بتخيّط هدوم العيّلين بالليل

أو يمكن يكون الشعر . . . . .؟؟

- يمكن .

عموماً

ف السفينة شرح واحد

واحنا دورنا نتنصر للخضر ، نكتب

نتنصر للفعل ، نكذب

نكتفي بالشعر ، نسهب

أو نحافظ ع اللي فاضل .

احنا دورنا الصيد بفتنة /

واللي يقتل شخص عاجز

مش مناضل

## خروج

بتفاركك البنت اللي كنتوا بتقسموا الليل كل حين

داكم بكاكم داء مايرضيش جراحين

ففارقها احسن قول لها : لو تسمحين

رجليك وصارت ثقلها أثقل من البركان

والصبر مايجيش بالطلب أول ماتصبر كان

الصبر على أرض ف عنيك لو طميتها بور كان

وانظر معاني الصبر ف عيون فلاحين

## {هامش}

انا لو هاقول ع الفراق

هابدا كلامي منيه!

والشعر قال ياما عه الفراق بالعيه

وقال كلام أكتد عه برد صاب اليديه

والشعر قال ع الفراق

انه الوجع بالليل

وانه البكا والسهر

وانه السلف والديه

وقال ف باب عكته

"إن القا فراقيه"

أوقات خسارة بفوز أو نصر بهزيمتيه

وكثير كتب ع السبب أو ميه مودى لقيه

الشعر وصف اتنيه كانوا زمان واحد

لكنه ماوصفش واحد

كمل حياته "اتنيه" !

منه تبتنا المظبوط لضحكنا ع النيل  
منه حضنتنا الميسوط لحضنتنا في رحيل  
ومنه عيال جرحان بيعطوا بالبعد  
رجالة أيوة صحيح بس احنا مش تماثيل!  
الراجل العادي  
وقت الفراق عادي  
يعني البعاد ده نصيب والرك ع البادي  
ويقول لها اسف واتمنى ليكي الخير  
وانا ماشي وانا عارف انك هتبقى لا غير  
ويروح يكلم سير مع واحدة بتنادي  
ده الراجل العادي!  
أما الرجال بصحيح وقت الفراق يتموت  
العشرة ليها جلال ومحبة بنت بنوت  
ف زمان بهذا الشكل ع الصعب تلقى شريك  
نادر تلاقى بنات جرحان وبينوا بيوت

بسه اللي له أثره والعامل المشترك  
اللي البعاد كسره وسابه يفكر  
هو الكلام بينكم ووصفكم للبيت  
وشكل أوضة الولاد  
ولون دهان الحيط  
بتحب تاكل إيه  
وهي شاطرة في إيه  
والحضنة وقت الشتا وحبيب ايدك في ايديه  
سألني صاحب وقال : إيه أصعب الأشياء  
قولت ان حد يروح وتبكي منه عليه  
طمينيني  
حاملة إيه؟  
كلميني عه حياتك يعني حاملة ازاي بدوني  
لسه بتحي الشوارع والمطهر والمبلوليه؟  
لسه بتحي العيال الشحاتيه الطبييه؟  
لسه بتحي المراسلة بالحنيه!

مشق هاقولك اسمه إيه

مشق هاقولك هو ميه

أحنا بنكمل حياتنا بناس أساساً حلم غيرنا

غيرنا بيكمل حياته بناس أساساً حلمنا

لولا إني بجد مؤمنه كنت أقول ده حرام بجد

بس أنا حمري ماياكره شيء يجيبه ربنا

باسم كل الناس معايا المجروحيه في القلب جرح

باسم لله بصر في مرآة شاف ملامحه ناقصها شرح

نخل شوقنا جريده خوفنا.. نخل نامي الحزن طرخ

كل واحد ساب حبيب

ثم كمل شيء بدون

كل واحد معهما يضحك

تلقى فيه دمه في عيونه

الفراق قسمة ونصيب

وأحنا مضطرب نسب

الفراق والله لعنة

نشكى للرحمة وجعنا

نحكي للناس دونه مانجرح

لو خدعنا او اتخدعنا

اذكروا حسه اللي سابكم وادعي مبره تشوهوه

واخرجوا برة اتئابكم واحنوا خوفكم واقتلوه

واضحكوا بملك تلاقوا

حلم بكرة تكملاه

باكتب لكم

عن بوح قديم يشبه صديقي . ،

كان صديقي شاب ف الستين

بص بهدوء ع المشهد المحزن ومل من الكتابة

قال لي :

عصافير بتخرج من بيوتها المغرمة

وبتصنع الروح سيمفونية

والناس ماهيش حاسه

الناس هنا

زهقت خلاص م الحلم

والبوابات مقفولة قبل ماتنفتح

الناس هنا مابقتش قادرة بتسم

ف اكتب لمن؟



قلت : نفسك بيخرج ف الكتابة

رجليك بتقوي ف مشيها بعد الكتابة

صوتك بيعلي ف الكتابة

سلم ايديه للقهوة وسألني :

سمعني آخر ما كتبت؟

(شب الولد للبحر واستسلم لترجاله  
والحلم سر الشعر ف شعوره وأوحى له  
فان الصديق والريق لما فترجاله  
خط القلم للجميع والشعر يعني  
كفونت صورته بملاحمي وقلبي وعيني  
وعانيته قبل ما يبتدي حتى يعانيني  
الشعر شعري اصاحبي في كل أحواله )

قلت لصديقي :

أشياء كثير هي السبب ف الحزن

صدقني

قاللي : تفكر نقدر نعطل موت ونكسب روح

تفكر ف بلاد بتتحدى الكتابة بعنف

وتشتهي كسر الولد ف بيانو من حقه

ازاي هنكتب؟

كنت باشبه طفل نط بخفة م الرابع

عشان يحسب مسافة اسمها " لاشيء "

قلت ف خيالي :

أد ايه خاننا المجاز وصنعنا عالم مش بتاعنا

ياأيها الشعراء

طوبى لكم طوبى

قادرين برقة تمدحوا السكر والفاكهة معطوبة

مانزلش عن ظهر الحصان

غير اللي خان يا أصدقائي

انتوا المسافات الأخيرة للبنفسج

ريجة التواريخ وهي بتتحر حاضر وبتنطلق للجبي

قلت لصديقي :

تفتكر نخرج بخفة ونسحب م اللحن

قال : لو بايدينا لاخترنا الخروج منها

قلت : لو كنت مش كاتب هتصبح ايه

قال : مراكبي يتدي اليوم بالمفاجأة ويتتهي بالحظ ، وانت؟

قلت : نورس

وارمي نفسي لأي بحر بيعشق الأناشيد

نحتفل بالليل وبالعام الجديد

ونحط روحنا كالقدر علي جيبة الحلوة

يمكن ننول أشياء مانعرفهاش

كان صديقي شاب ف الستين

يصدمني ف اكتب

يبني سور من ليل قصادي انتصر واعبر

أصبر ف يقتلني بهدوء

يقتلني فاصبر

بس النهاردة كنت مش قادر

كانت بوادريأس ما اعرفهاش

كان ليل بيخرج من عيون الطيبين ع القهوة ويانا

وبينصهر فيا

قاللي جملة لو ما قالهاش وقتها

كنت مررت الورق بهدوء ف كراستي

وانسحبت

قاللي :

سمعني آخر ما كتبت

## خروج

مش بس فرق العمر يفرق ف الأغاني والورود  
لكن ساحات التجربة والوقت بين لفتة وشروء  
النار بتصطاد التاريخ أول ما بيصيبه البرود

لكن صديقي كان مكان بيسير ف كل مكان  
بيونس الليل بالقصص لو ونسُهُ ف الإمكان  
بيقدم الخبرة لصبي ويقولهُ كان ياما كان

والشك بيصيب الفتى كل اما يمشي يعود

باكتب لكم

عن أصدقاء بيكونوا من سطوة الدخان مكان

بيقسّموا الوقت اللي بينهم بالتساوي

أصدقاء واخدين مكان ف الكادر بإرادتي

وكإني لما نويت أغرب قلت اقرب

أصدقاء

ماخطرش علي بالي اننا نصبح روافد عند نفس النهر

والناس يمارسوا الفولكلور علي شطنا بهدوء

الاسم: اشخاص بتخرج من دواير شك للراحة

السن: مايكفي من الليل والبلوغ والحب

المهنة: لازم يكونوا بيرقصوا زيي ،

مع اختلاف نوع رقصهم حسب الأماكن واللغات

الأيدلوجيا: .....!!؟؟؟!!

يا صديقي

تفتكر ان الشوارع بدوننا ليها طعم

انا وانت آخر ليل بآخر روح

انا وانت احساس البجع بالرحلة والتواريخ

صخرة كوميديا بتتكسر من موج خلافنا واختلافنا

دلوقتي واحنا بعاد ماتت عجيش

انا سيبت بصمة ايدي ف الأوضة

علي محبس المية اللي ف الطرقة

علي اوكرة الباب اللي كان لو يفتح

تدخل عيال

من كل صنف ولون

يا صديقي

لينا ذكرى من خلالها نصنع احنا الكون

يا صديقي

ف الشوارع شيء يشبهنا افكرتك

كنا من أيام بنمشي ف الطريق

متطوحين بالحلم

متلونين بالأغنيات اللي ابتدت بينا

قلتلي : تشربها ايه

قلتلك : مضبوطة كالعادة ،

وهل ممكن نغير ذكريات الملح ف السكر؟

هل ممكن نحن لطعم غير طعم اختيارنا للذكرياتنا؟

كان المطر بيزور مدينتي ف يوم

ويزور مدينته ف يوم

بس كانوا الزرعتين يشبّوا ف بيوتنا



زرعتي تسبق ساعات فتشد روحها فوق ضلوع البيت

وتسكن ف التراس

وساعات بتسبق زرعته

فتمد فرع بييتدي من عند بيتهم يّنا

ياصديقي

فرق الأماكن ف شرعك مش مسافة

وهناك هتحصل حاجات بتبدأ من هنا

قلت له:

يمكن ساعات بنحب روحنا ف شيء بيكرهنا

قال لي:

وكتير قوي نكره حاجات بتحبنا

## خروج

يا صاحبي انا وانت يادوب واحد صحيح باين

انت المدين ف الرحلة دي وانت كمان داين

باخشي لقا من غير سلام واخشي فراق حاين

صاحبك إذا صاحبك طريق من حقه هيلومك

جهلك ف علمه بشيء يجوز مع جهله بعلومك

دمه اذا سال من ايديه بيان على هدومك

واللي يبيع سكة مسير لازم يكون خاين

المشهد ٤: أثر الفراشة " ماسيكونُ كان "

تخيل لو انت رميت غطا ازازة ف الشارع ، الغطا ده  
هتدخل جواه نملة ، عامل النضافة هياخد الغطا ف  
الكيس ، النملة دي هتخرج من الكيس تقرص بني ادم ،  
يورم ذراعه مايعرفش ايه السبب ، يروح المستشفى يسأل ،  
يعمل حادثة وهو في الطريق ا يموت . تخيل ! من غطا ازازة  
رميتها ف وسط اليوم الطويل

كل الحاجات اللي بنعملها من غير ماناخد بالننا ويترتب  
عليها مستقبل ناس تانية عمرنا ماهشوفهم ، الكتابة هنا  
بتكون مُربكة والتفكير كمان لو خدك مش هتخلص من  
المشي فيه ، عموماً كلنا أسباب ف تفاصيل مانعرفهاش

المشهد

متمرو الأنفاق

الموسيقى

مقطوعة " ملاكي اسكندرية " ياسر عبد الرحمن

الإضاءة والديكور

ثابت

الحالة

جدة

وبقول لكم من عزلتي

عن حكمتي ف الشر قاصد خير

أو لمستي للطيبين ف محطة الدنيا

هل كنت قاصد كل ده؟؟!

ما اقصدش اضلل شخص قال لي :

فين اتجاه شبرا؟

كان سهل جداً أقوله : أدخل شمال ف يمين

لو قتلته ادخل شمال ف يمين

ماكانش قابل بنت ماشية ف اتجاه حلوان

وبدون سبب

كان فجأة قاعد ف الصالون يشرب شاي

ويتكلم مع الوالد عن المعازيم

ما اقصدش شيء

ساعة ما قلت لبنت حبتني : كملي وحدك

كان عادي جداً أقول : لازم نكمل سوا

لو كنا كملنا . ،

ما كانتش دلوقتي بتضحك

ضحكة رجّت قاعة السیما

وايديها حاضنه ايديه بياكلوا فشار

ما اقصدش حاجة لما قلت لشاب ف الندوة

بلاش الشعر . . . . مش شبهك

لو قتلته كمل

ماكانش صار العازف الصاعد

ولا كنت هألمح صورة لیه ف مجلة مشهورة

ما كنتش أقصد أي شيء

ممكن تقول ان اللي زيي موجودين أسباب

علشان بشر تانية ما يصدّهاش الباب

علشان مطر يقصد أراضى بتشتكى من بور فراقها

واحتراقها

علشان غنا الألدغ يوصل فكرة العاجزين عن التوصيل

فلو سمحتم

لو شفتوا موكب ف اتجاه الكعبة ماشي

وقفوه / وما تقتلوش الفيل

ماكانش يقصد صدقوني وما كنتش أقصد

بس حظي سندنني مش فاهم نجحت ازاي

دلوقتي لازم تهتفولي كلكم

أشكروني ع اللي كوّنته بجهالة واستحالة

أشكروا المحولجي ع اللمسة اللي

عدلت سير حياتكم للجميل

ردوا الجميل ف الأغنيات

قولوا ف خيالكم :

نشكرك ياأيها السر الغريب

سموني خضر ف سر كم . . آه

سموني خضر

أو نجم لامع دل تايه ع الطريق

فارتاح على الشاطيء

وكون ذكريات محتاجلها

يومها افكر ان اللي دله النجم ف اتبسّم

وبخط أوسع م الزمن دوّن علي الياطرة الخشب

" اسمي مكان "



أنا شخص واحد من كثير  
يغيروا بالأحداث بدون ما يحسوا بجميلهم  
بمسحوا الدمعات بمنديلهم  
وبيمشوا رغم الوصل تايهين ف الميدان  
لو تهت منكم هتلاقوني ف أغنياتكم  
عند واحدة بتبتسم بفشار ف ايدها  
عند عازف ترنيمات الفرح بتزيده يزيدها  
عند واحد كل مرة يروح لشبرا  
يلقى نفسه بدون ما يشعر  
ف اتجاه حلوان .

## خروج

هي الصدف بس الصدف جرحي القديم بان فيك

عمر ك ما ترضى بالقدر حتى ان زمان بنا فيك

من غير نظر شفتك حزين من غير ما ابص انا فيك

يمكن يكون دربك جنوب وتعيش بقلب شمال

وسكة تلمح فيها قبح قد بتنتهي بجمال

خانك نصيبك ف الرؤى واتهز فيك وجه مال

مش معنى اني اعترفت بيا لا بد أكون بانفيك

{هامش}

كل اللي جاي قد كاه

مكتوب بقاله زماه

. حاصل زماه ف مكان يدينا ناتج كام!

. يدكوا ذكرى وأمل أو عمر ذبيعتوه

كل البشر ماريونيت وف الطريق العام

"ناس لما مشيت غلط قابلوا غريب خبوه"

الحظ « بيانات والصدفة حلوة وخام

ارتبطوا ساعة قدر / سقوا ابنهم " Dejavu "

الخدعة عايزة النظر، لكه توخي الحذر

المشهد الداخلي مش حلو كما براه

فيه حاجات اذا شوقتها بعينك تقول الله

وان غُصت فيه عمقها

تطلع بصمت رهيب

أينشتاين له يله

غير ترس في اليانصيب

والعدسة لو قرنت

ممكن نيشانها يخيب

بنت التلات أحوام وقفت تبيع مناديل، كان وقتها التأسجي جوه  
الإشارة حزيه، اديتله علية ابتسم واداهها ه جنيه، جريت على  
البياع عشان تشوف فكة، اخذ الفلوس فكها ودفعها وسط ايجار،  
والحاج صاحب البيت اداها للزبال، مسك الفلوس وافكر قام حاسب  
النجار، وأخذها منه صاحبنا نسيها جوه قميص، ابنه لقاها طمع  
خنيها في الأنوبيس، ولقاها شيخ أزهر في دفعها للكمسري،  
والكمسري كها واداهها للسواق، كان غاوي شرب وسكر ودفعها  
البيرة، والصبيح صاحب البار اداها للجرسون، جاب بيها جينه  
وحيش وتركها للبقال، ودفعها للمندوب فاداهها لمراته، ومراته  
لحماته وحماته للسباك، راجع في آخر اليوم تعبانه ركب تأسسي، في  
اداله خمسة جنيه كانت بتاعته زمان

ادي فيلم منه حُملة. ايش حال بقا الانسان!

لو كان أبوك ماشرىش سيجارة في سيجارة  
ماكانش مات ربما ولا صاحب السرطان  
وان كنت جيت من الحجاز وركبت عبارة  
كان ابنك اللي اتولد له يأتي حتى الان  
لك ما فيش للقدر في ايدينا ستارة  
وعشان كده لم يله إلا اللي فعلاً كان

لو رجلي اتكسرت شيء عادي  
ممکن اركب " ساق صناعية"  
لكن لو روحي اللي اتكسرت  
مالهاش أي حلول طبية  
انا اسف لسيجارة رميتها  
من قبل ماتلفظ أنفاسها  
اسف لهدوم جاية مقاسي  
بس انا مش جاي على مقاسها  
أنا اسف للضحكة بشدة  
على حزن مع الوقت حبسها  
اسف جداً لبواقي الذات  
وحاجات بتجرف ديلها حاجات  
زرعوني تاريخ . . حصدوني تاريخ  
عصروني حنين . . نزلت بنات

جدي ماشفتوش بس باحبه  
عمي قابله ياريتني ماشفتوش  
كل اللي بقيته بدون مجهود  
ضاع مني بجهد حاجات مابقوش  
أنا بهري ف ايه  
ده كلام فارغ!!  
- هما بيقرؤك  
- بكره يملّوا

خدوا شعري قصاد حد بميل له  
وادوني السهرة الصباحي  
وصحاب الحارة، ونصبة شاي  
ادوني البنت اللي عاوزها  
وانا هاديكم سر كتابتي  
واديكوا كمان كل ماحيلتي  
كل اللي انتم شايفينه نعيم

كونوا نفوسكم

وبلاش تزييف

الدنيا ميزان

والجرح خفيف

والحزن ميدان

والصبر وليف

كونوا نفوسكم

مش ناس تانيين

واشتموا ببجاجة ف وقت الضيق

واشربوا بيرة ف شهر ديسمبر

واسمعوا مزيكا بصوت عالي

واحضنوا ف الشارع مش ف الضل

واقفوا عرايا ف حضن المرايات

واتمنوا حاجات . . وماتعملوهاش

وابعدوا دائماً عن أي فلاش



اطلقوا ضحككم

ما تمسكوهاش

وبلاش تهتموا بمنظركم

وقعوا كشري على هدومكموا الشيك

اللبس بدقة يبقى أنيق

قولوا ف سهراتكم ألش رخيص

واشبطوا ف حديد اخر الاتوبيس

روحوا السينمات مع كل خميس

واخرجوا م السیما بشكل جديد

واهتموا بشيء غير شكل ولبس

الروح كما قلت " ان انكسرت "

مش ممكن ترجع روح بالجيس!

ويقول لكم :

كانوا جماعة من بنات بيغنوا أناشيدهم

وبيبدأوا بروفة لحفل السبت

كان مصري واحد بس ف الفندق

بإراقب الأصوات بحر ص وينطلق فيها

كانت ساعتها بتبتدي تقرب

وببتدي ف الشك

قالت :

لو تحب تكون لوحذك / كون لوحذك

بس مركبنا تساع واحد كمان من غير ماتغرق

لو تحب تضيف على الأهازيج ملامحك

إحنا أولى .

هل بإيد واحد لوحدہ إنه يرفض بنت من تونس

قلت حاضر

كان صحيح الليل مؤقت

والغنا للفجر أقصر م النفس

بس فعلاً للموسيقى ليل بحجم الأرض والذكرى

اللغات ف اللحن واحدة

" بارشا " عندي أو " كثير " عند الجميلة التونسية

مش هتفرق

مؤمنين بالواحد الإنسان وبالنسيان

وبيناع الأقل

وابتديت الحكى عن نفسي

عن بلادي اللي ارتضت بالعشق والفيضان

ورمتني مجهول الهوية للشواطىء

عن غنايا الخاص ف وصف الناس

غنيت يوميهـا أغنيـات السـمسمية فانتشوا

واتحركوا بالأغنيـات التـونسية

واقلامسنا

زي ضل فراشة مايلامس رحيق الورد

وانطلق صوتنا النشار المنتظم

يحرق خشب من أغنيـات البرد

كلمتني عن ولد خد منها مفتاح أوضتها واختفي

عن أم ربة بيت بسيطة

جاهلة يمكن

بس أستاذة ف فنون المزرعة والحرث

قالت :

صدرها كوكب حكاوي لو طلبت النوم

أو مخدة للدموع لو تهت من نفسي

صوتها أوسع من نهار أول نوفمبر

لما غنت للجبل

غناها واستسلم

واما غنيتلي

ابتديت العزف زي النزف

وبقينا دون مانحس شركا ف كل شيء

ف الشاي

وف الأحلام

وف الغنوة

تقابل اللهجات هنا ف القلب

تتحرر اللكنات من الإعتماد وتصبح لنا حرة

كانت ف ايدها تذكرة سبعة صباحاً

وف ايديها الثانية قلب نحاس

وكاني مفطوم ع الفراق والبعد

كل قلبي ما يحفظ الأسماء ثلاثي

يبتعد عنها

كانت صديقتي تشبه البارفان وتشبهني

ضمتني جداً وبدأت ف البكا

قلت : البكا بيخلص المشهد حزين

ممكن ف يوم شتوي نعود ثاني

نبتسم ف الفيلم

ونعيط على الكوبري

نغني بلهجة واحدة

وننقسم مع بعض باستمتاع

والقلب يوهب للغنا صك البداية واللقا

وكإنه م الحزن اكتفى

لياً أول لمسة منها / حضنها

وليها ركن النار وأسباب الدفا

اللي واثق منه فعلاً

اني مش عابر مؤقت

أو مجرد

حد خد مفتاح أوضتها واختفى .

## خروج آخر ضروري

بالروح مفارق ومش فارق هاعاود أو هاروح  
سايب فراغ مالي المكان أجسام ثقيلة ناقصها روح  
سايب خُطايا الناقصة خطو ودهشتي وسط الصروح

من غير رفاق يارحلي عتمة ماليكي أمان  
وزهقت من كرسي التراث وانا بافتكر ف زمان  
هرب الزمن مني وضاق بيّ المكان

ومش هاقول ف الوقت ده ياروح مابعدك روح



## ملحوظة:

الحكاية باختصار  
بنت أطيب م النهار  
أيد تغمي عنيك بخفة  
وانت بتدوق الفطار  
أم تعرف تبقى طفلة  
طفلة تعرف تبقى دار  
الحكاية عن عنيتها  
سيها صيفي وليل سكات  
الحكاية عن حدودها  
ورد نبت غمازات  
بنت مكتوب ف بطاقتها  
انها كوكب بنات  
والصراحة قلبي دايب  
يوم بشد وعشرة سايب  
انتي حزن لشخص غايب  
انتي دستة بالونات

أما بخصوص الخناق  
واننا ف عدم اتفاق  
وان بيننا حرب أطول  
م اللي دايرة ف العراق  
ده جمال الحب فعلاً  
لعنة الحب بغباء  
وابتلاء الغيرة واجب  
دائماً الغيرة ابتلاء  
وانتي ممكن اغير عليك  
من دفا وشتم ف ايديكي  
من عنيكى لو تغمض  
ثم فجأة تشوف عنيكى  
من حاجاتك. بارفاناتك  
من هدوم علي شماغاتك  
من كلامك من سكاتك  
من صحاب ماليين حياتك  
ف الطبيعي نكون تملي في اختلاف  
والطبيعي ف كل شهر يومين عجاف  
والطبيعي لانك انتي الكون بحاله  
اني اشوفك عكس كل الكون ماشاف

ف الختام

فيه كلام محتاج اقوله بس مش لاقى الكلام  
فيه حاجات محتاج اقولها وانتى عارفة انى خيبة  
وانى بتلخبط ف اسمي  
وانى باعرق لما افكر  
وانتى عارفة ان انتى سكر  
وانى من غيرك وحيد  
وانى صايم طول حياتي  
فجأة شوفتك جاية عيد  
وانى مش عارف اعتبر  
أو ابتن شيء جديد  
أو أقولك يعني مثلاً  
انتى نجمة فوق بعيد

فاعذريني، واحضنيني حضن كافي  
حطي ايدك فوق كتافي  
وارقصي حتي ف خيالك  
تنزل المطرة اللي ساكنة ف غيم جمالك  
واعذريني لو ف نفسك كلمة عمري ماقولتها لك  
واعرفي انى بحبك  
وانى جنبك للنهاية  
هي دي كل الحكاية.

باكتب لكم

عن جاري بيع الهدايا والتحف

لما انصرف للموت وساب مدد ومساحة للتأويل

(مات من السرطان)

قالوا الجيران واستشهدوا بروشته الدكتور

فصرخت فيهم: لأ ، مما تشم السرطان .

كان فيه سبب أقوى

سبب يجبر عجوز ع الغياب

ويشد قلبي للبكا

وازاي يعيش والبيت كئيب مخنوق وسع

جدران بردانه احتراف عزلة

وكل الأماكن فيه

بتطلع التواريخ

بنته

قبل ماتسافر بلاد حرّانه تلج

سابت خيوط الذكريات ف البيت

كعنكبوت بيغيّب الكرانيش عن الرؤية

تفاصيل سابتها البنت مش قاصدة

مثلاً:

فستان حرير أبيض

كانت تبان جواه كبدر ف ليل تمام

بارفان مشير

ماكياج من النوع البسيط

وعروسه باربي

كانت بتحكي معاها ع الواد النبيل

اللي شافها ف المسابقة وابتسم ثم انقسم

جائز ساعتها قال لها :

هتسيبي حضني لين

فانخرطوا ف جنينة بكا واستسلموا

دلوقتي

أربع صور ف الجامعة واتنين ف ابتدائي

مايعوضوش طيفها

مايعوضوش دخلتها ف المطبخ عليه

ومعاها شو كولاته

وكأي واحد زيّه مر بالسبعين

ماكانش يقدر ع الفراق

قال لي :

ف السن ده بالذات

كل الآباء أبناء

كل الكبار أطفال

يتشعلقوا ف مراجيح من الذكرى

يهتموا بالتفاصيل

وما يطلبوش تأويل

بيسيبوا للخبرة التوصل للنهاية

ويعيشوا ع اللحظة

سافرت

مافضلش منها

غير فواتير الهدوم وشرايط الفيديو

وعجوز

ماقدرش يرجع بقلبه م المطار فانهار

فرط حنين قبل الفراق مايكون

ف اتجمعوا الناس اللي شبهه

وشافوه بيرحل ف اتجاه أبيض

وملامحه بتخاصم جنون الشمس والرمال

صرخت فيهم : مات من الفرقة

والله م الفرقة

ماماتش م السرطان



## {هامش}

ألف رحمة ونور عليه  
مش هتفرق اسمه ايه  
مش هتفرق ايه ميه  
كان رفيع / كان تخيه  
كان بيضحك.. كان حزيه  
كان حرامي أو أميه  
كان قصير أو طويل  
كان بينسي أو أصيل  
يقي حامل ولا عالم  
أو مشاغب أو مسالم  
أو مناهض أو موالي  
الموهل واطي / عالي  
لبسه خيش أو لبسه غالي  
معها يقي ميه وايه  
ألف رحمة ونور عليه.

## نشيد للغياب

ويا ما الخليج خد بشر من عيالهم  
عيال كان أملهم  
يخسوا بمعاني الأبوة وجمالها  
يخافوا اذا الساعة عدت حداثر  
ويستنوا ياخدوا ف حضنه العيدية  
ف مين اللي قال الهروب مسئولية!  
ومين اللي قال ان لم الدراهم  
هيجعل ولادك يخسوا بأمان  
انا اعرف غلابة وعمال نضافة  
عرقهم ييملى الزمان والمكان  
وكل الفلوس ف البنوك والاراضي  
ماتسواش وجودهم ف لمة فطار  
سلام للي عيط وساب قلبه واقف  
بيستني ابوه عند باب المطار  
لكن برضه عيب اني التوم اللي سافروا  
وتعبوا وعافروا  
وامنوا بوطنهم لحد اما كفروا  
أكيد هما يعني قلوبهم بتبكي  
ما فيش حد عاقل بيتمنى غربة!  
لكن لو بلدهم بتقتل بقسوة

فلازم هيمشوا مادام هي تربة  
يصونوا اللي فاضل ف بكره لعيالهم  
ياكل اللي ناضلوا وشدوا رحالهم  
ورهنوا حياتهم مقابل مدارس  
واكل وملابس  
وتمن المكيف  
وحق المصايف بدم المصيف  
واسرة سعيدة  
قريبة وبعيدة  
يقابلوا ولادهم ف شركة صرافة  
ويمشوا معاهم لحد الأرافة  
يصلوا عليهم  
ف كام متر رملة...  
وهل ده اسمه أمله اني اموت قبل ما احيا!  
وهل فيه ف مشاعرك حاجات لسه صاحبة  
باعيط وباضحك  
بالوم بس باعذر  
بلادي التي كل يوم فيها موت  
بتكتملي صوتي بحق اني عايش  
بابوش لما بافضل واكون بره بايش  
اجيب حق موتي وحق الغوايش  
وتسمحلي اشوف العيال ف الاجازة!

وهل ده وطن يبقي ليه أي عازة؟

بلاد فيها عالم ف عنق الازازة

ياتطلع ف غربة ياتفضل تموت

ياغربة حزينة بتشبه مدينة

بتبني الضغينة

وتمحي البيوت

بأكد لذلك..

بإن السكن في نواحي الزمالك

وإن اشتراك النوداي الكبيرة

وفكرة وجود الجراج ف العمارة

لايمكن يساوي الوقوف ف السفارة!

وأكد بإن الهدوم وسط ناسك

تمنها يزيد عن وقوفك ف " زارا "

تنقي بسنين اللي غابوا وسابوك

جواكت تمنها مشاعر ابوك

وجذمة تساوي مرتب سكاته

ووجعه لانه مشافش اللي ماتوا

وحزنه ف بلاد الوجع والاهانة

يارب اللي سافروا

إيدك معانا

يعودوا لبلادهم

ويبقوا السند والوسيلة لولادهم

وتستتر فؤادهم

ماحدث يشوف المصيبة ف مسافر

وتجعل طريق المطار عودة بس

يارب اللي عيط وفكر وحس

ورب البلاد اللي خانها الضجيج

تخلي البلد دي لأهل البلد دي

وتجعل بلاد الخليج للخليج.

واكتب لكم عن حبها " كان لا بد أحبها "  
علشان كده دوناً عن الألف اللي حضروا حفلها  
انا الوحيد اللي خبطت ف كتفها

هي

ثلاث أمتار من البهجة  
خمس أشبار من المرح الطفولي والندا  
تقدر تقول مصر الجديدة  
قبل ماجهاز المدينة  
يجبر الشارع علي استقبال مزيد م الاعلانات  
والاعلانات علي قد مابتكبر  
بيزدادوا الضحايا ف المدن  
حسب اتساع الاعلانات

او ربما

حسب اتساع صدر الأهالي ف المدن

لا أعتقد اني بيعط غير هنا  
في ركن ضلمة ف مسرح الأوبرا  
ف المكان اللي اتولد حلمي البسيط جواه  
حلم انه ينزاح الستار عني  
فاغني

لا أناية إذن  
النص ده للبت دي  
أما انا فمجرد الراوي اللي يعرف شكلها  
بارفانها لما بين صفين ف مسرحها  
حق الفراغ لما تعدي بيملي مطرحها  
وحاجات كتير ثانية  
الشعر مش دوره يوضحها

رقصة عشان امي

ست الجهات الاربعة

والرحلة بالكامل

رقصة عشاني ياصبية

علميني القاهرة من ثاني

أرجوكي

ماعرفش غير القاهرة القاسية العتيده

كنت كل ما احب افارق

اجي افارق من هنا

وارجع واقابل من هناك

واجي افارق من هنا

وارجع واقابل

وكانها بتوصل الشوق بالقنابل

وكانها رافضة السنابل



والليلا دي

كل شيء بيغني ليكي

انتي وحدك ف المكانة المعلنة ف القلب

الجهر باده من هنا واللعن وافر

ف بلدنا ع الساحل بلاقي ميت سبب يجعلني ما اسافرش

ف القاهرة مليون سبب

يجعلني اسافر

انا بروحك يا صبية بقول لهم

اللي يحرم رقصة العاشق لروحه

يبقي كافر

مين أنا

غير انتي لما بتنحني بجسمك فيخضر المكان

مين أنا

إلاكي وانتي بتمنحي الجمهور مشاهدة مستحيلة

ف الكالوس كنتي  
وكانت رعشة بينة من عينيكي  
اللي زاح عنك ستارة اغنياتك كان أنا  
أنا اللي زقيتك بايدي للحضور  
فمليتي روح الأرض نور  
ورقصتي للعالم

يا أيها القادم من المدن البعيدة ع الطريق الساحلي  
بلاش تروح الأوبرا ف ديسمبر  
بلاش تمر بسرعة ف الصف الأمامي  
خلف واحد تاني مر  
لأنك لو حاولت بخفة تتفادي التصادم  
هتخبط فيك ساعتها  
وبرضه هتحبها  
هتحبها لامفر

الرقصة دي

بدأت من خمستاشر سنة

عيل سبع سنوات ف ايدين ابوه

والقاهرة بالنسبة ليه

يمكن مجرد حلم شافه

بعد فيلم قديم عن الموت ف اتجاه القاهرة

والقاهرة بالنسبة ليه

سبع أعمام ما عرفش عنهم أي شيء

غير انهم عزّوه ف ابوه اخر ديسمبر

وانحنوا يملوا كتافه بالدموع

ويعدوا تذكرة الرجوع

العالم التالت أنا

أنا البؤج اللي فضت نفسها علي سكة القطر القديم

واستنت الراجع من الغربه ماجاش

لان تذكرة الرجوع عمر البشر

ولإن تذكرة الذهاب ببلاش

لافايدة من هذا العبث

لافايدة خالص م المحاولة

فانتي أولى

وارقصي

يا أيها العالم

وهي بترقص البنت انتصار للناس

أنا والغريب واحد

وهي بترمي طرحتها لفرحتها

انا والغريب واحد

يا أيها العالم

تعباً لأرض العالم الثالث وهو يكتفي بالدور

وبينتهي بردان

تعباً لصدر ينفتح للنار وينتظر يوم القيامة

ارقصي يا بنت، يا ضل قلبي الليلة ع المسرح

وموتي بعدها ممكن، بس اتركي للناس علامة

هتفضل أرض العالم الثالث كأرض العالم الثالث

طول ما الصدور مفتوحة للنار بابتسام

وبتنتظر برداً سلاماً

فارقصي .

للمطر

ما للمطر من حق

وانتي أول مطرة يشهدها التاريخ

(هو صديق الهوى غلاب ، ما عرفش أنا ، والعجبر قالوا مبرار  
وعذاب ، واليوم بسنة؟)

ما للأغاني للأغاني

وانتي لحظة رقص صافية

أمهاتنا علمتنا

لما ترقص بنت اجمل من تاريخ القاهرة

لازم برهبة نحترمها

حقها ف الرقص

حقها ف الكتابة

لما وقعت بوابات القاهرة

كان السبب بنوثة رقصت

والحضور ما منحش رقصتها احترام

وده ف شرع الانسانية يا اصدقائي حرام

مين أنا

علشان فتاة من أرقى احياء المدينة ترمي ف حضني!

وانا اللي كان قمة طموحي

افوت وراها اشم بارفانها واخرج بألوانها

كإن حتم السما وقعت ف ايدي

بس لما الصورة تتغير ف لحظة

وتسيبي ع الأرضية ورقة ملونة

فيها أرقامك واحلامك وعنوان الإقامة

فالسما بالشكل ده زادت كرمها

وما فيش قصادي الا شكري واحترامها

(جاءا القوي مع غير مواجيد ، وكل مدى حلاوته تزيلا)

كان صوت هدوء القاعة

أعلى من كاسيت أتوبيس يحمل طلبة للنزهة

وكنت وحدي ف المكان

كأني وحدي

لإن ألف زيادة غيري كانوا موجودين

وكل واحد منهم بيظن نفسه كان لوحده ف المكان

بس اكتشف ان المكان كان فيه زيادة

ألف غيره موجودين

العالم بيتكرر إذن . . . احنا اللي مش ثابتين

الضوء اللي انطفي ماكانش توزيع للإضاءة

كان احترام ليها

والديكور اللي اختفي كان احترام ليها



الطفل اللي عيط ف الصفوف الجانبية

كان بيبكي مش عشان محتاج طعام

او لإن صباعه ف الكرسي انتنى

لكن لإنه ف لحظة ماشافها

عاتب الرب

بكل مافي الطفل من صفو وبراءة

ليه ماجاش للدنيا من عشرين سنة

يمكن ساعتها

كان هيملك ويا هذي البنت آخر حكاية

ويجوز هيحكيا

ياأصدقائي

عشر ثواني دلوقتي من حقكم

كل واحد منكم يفتكر للست غنوة

وسراً يغنيها

غنوا: .....

باسمي القاهرة ف الفجر شادية

واسميها الصباح انغام

واسميها ام كلثوم ف المسا

من حق شاعر زبي مات مرات كثير يسمي الليل

كما يهوى يسمي الليل

من حق صاحبي مغرم الطلبة يسمي الدنيا دوم ، أوتك

من حقنا نلرزق فرادى ف بعضنا فتصير جماعة

من حق واحد حب هذي الدنيا طول العمر

دون مايميل

يرفض حبها ساعة

بنفس المنطلق وبحركة تانية

صدقت اللي قالوا من صحابي

اني بنسى ابقى الدغ

كل ماطلع ف الإذاعة

(يمنى قلبي بالأفراح ، وأرجع وقلبي كله جراح ، جراح ، جراح)

الغريبة ان كل الناس هنا حبوكي مش قاصدين

كلهم حبوكي يا حلوة

كلهم

أعمي هامر ما بين الوف الفاتنات وهاعرف مطرحك

من وسطهم

بالريجة يومها هاعرفك

بالنسمة لما تفوت ف قلبي تملأ أركانه

باللمسه لما تشيل عن كفي احزانه

بطعم اسكندرية

اول الأشياء دخولاً صدري من عشرين سنة

مازلت انا

وانتي تملي مازلتني

امي انا . . . انتي

اختي واخويا وذكرياتى وبنتى  
الرقصه دى خلطت ما بين جسدين هنا  
وانا باسألك ، مين اللى مال ف الرقصة دى  
انا اللى ميلت ولا انتى اللى ميلتى

قاهرية اذن  
اللى تسيبك تقرا بارفانها  
قبل اما تقرا ورقة باسمها ومكان اقامتها

قاهرية اذن  
اللى تاخذك وانت داخل اخرتك  
وكإنها أنثى بتعملك عيل ف دنيته  
لا ارى غيرها ولسه لا ارى  
ويقول لكم بهدوء فلا تعلنوها

أيوه حبيتها

(اناى باترى اهو ده اللى جرى وانا وانا ماهرفش ، ماهرفش انا).

لسه برضه زي ما انتي  
أربع سنين مايغبروش زيك  
مايغبروش ضحكة عنيكي الطيبة للناس  
وهدوئك العاصف علي الطرقات  
أربع سنين  
مايبدلوش ذوقك  
شكل اختيارك للهدوم والعطر  
تسريحة الشعر اللي لفتت نظري أول يوم  
بس الغريبه اننا يوم ما افترقنا  
كنا برضه ع المحطه  
تفتكري  
إيه العلاقة بين لقانا والمحطة؟

طفلين مايعرفوناش  
بصولنا وابتسموا  
مد الولد إيدو واداني عسلية  
والبنت مدت إيديها بواحدة علشانك  
هل هو ده سكر لقانا الاخير  
وليه منير  
غنا بهدوء ف الوقت ده  
"لو كان لزاماً علينا الرحيل كارهك ياوداع  
ولا بديل"؟!

باقولك ايه  
ماتيجي نكسر حد هذا الصمت  
انا ببساطه  
هاعزمك ع الشاي  
وانتي ببساطة تقبلي  
أربع سنين  
مايوصلوش عاشقه لرفض الشاي  
ومايخرموش عاشق من اللحظة  
خلينا نتكلم كلام ثاني  
مش هاقولك كنتي فين  
ولأ ليه البعد ده  
مش هابص بغيره ع الدبلة  
ولأ اسأل عن صاحبها  
جايز يكون عالم  
ولأ عامل  
أو سياسي /  
فنان مريض باللقطة والفكرة  
بيكّب نص اليوم علي القهوة  
ويكّب نص القهوة ف هدمه  
أو يكون عازف أجير  
بيقدم اللحن لسكاري مستحيل هيشوفوا فيه موتزارت

أو يكون شاعر خبير  
يقدر يخط الوردة ف الخصلة ببراعة  
ويخط مايكفي من الشهرة  
مش هتفرق

انتى كمان ماتركزيش على حز في صباعي الشمال  
ماتسألش عن أول التزوات وآخرها  
عن شكلها / لون شعرها  
تفاصيل كثيرة عن مكانها ف الخريطة

انتى بالنسبالي حرة  
تشربي القهوة بزيادة ولا سادة  
بمسك الفنجان يمينك أو شمالك  
اللي يفرق وقت هنقضيه بعيد  
نستعيد الذكرى فينا ونستعيد  
نطلب اللحن اللي بنحبه ونرقص  
تلت ساعة /

قبل ماينادي المنادي ف المحطة  
عن معاد قطرين شمال وجنوب

اللي عايزه  
ان لو واحد جرح ف اللحظة دي  
التاني يرفض يخرجه

كلها شوية ونرحل عن هنا  
واللي قتل جرح سابق  
مش هيقدر يفتحه

فكرة حقوقنا ف بعض ماتت والدليل  
لو نقط الفئجان دلوقتي ع الجيبه  
مش هاعرف اعمل بامسحه



{هامش}

بخصوص أمي

- عاوزة أفرح بيك
- لما أفرح بيكي انتي الأول
- اتلم ياواد بتكلم جد
- انا عاوزة اتطمع ليك وعليك
- والنبي فلك
- والله عبيط
- انا يابني هاروح مش هاقعدلك
- محتاجة اشوفك سائت بيت
- هو انا يعني بنام في الشارع؟
- يا حمار اديني عقار نافع
- مش هتجوز انا كده مرتاح
- أنا أمي كمنجة وحضه متاح
- وميشاعر معرفش احكيها
- أنا متجوز أمي أساساً

منظمه وانا عايشه بيها  
 انا كل ما بهرب منها واغيب  
 بالكشف ان انا بهرب فيها  
 الست دي حالة ماتكرش  
 تتغير..... هي ماتتغيرش  
 الدنيا تشيلها وتعبدوها  
 تطلع تنزل  
 تكسرها تقوم  
 انا امي انوثة بـ ١٠٠٠ راجل  
 ورجولة بدرجة ناي مكتوم  
 ساعة ماتوفي ابويا وناح  
 شوقت ف نظرتها كلام وجراح  
 مع يومها وهي عمود البيت  
 والامر دايماً / والناهي  
 - الدوا جييته؟  
 - فاكراي نسيت؟؟  
 - انا عارفه ان الدنيا تلاهي

احضنها تقوللي امشي يا نصاب

بتغيب أيام زي الاغراب

وتقوللي مشاغل وأبصر ايه

- انا أصلي بقيت شاعر معروف

- قالك معروف.. بأمانة إيه

كوافيلك تشهد يامهنأ

ف بضائي يأمرة أنا بتلرق

واخرج على أوضتي شوية وانام

واسمعها تصلي وتدعيلي:

- الواد تلفاه، انما طيب

وانت قريب

ارزقه رزق بحجم السماوات

وارزقه بالخلفة ولاد وبنات

وتنام وتقوم تلاقيني مشيت

فتقوم تبدأ تويق ف البيت

أنا اسف جداً يا حبيبتني

علي سفري الدائم والاشغال

علي كل كلام ضايقتك وانتقال  
انا معهما بدور وباعيشك في الدور  
باطلع وانزل واجي عليك  
أنا راجل جداً  
ورجولتي تلخيصها في بوسة علي ايدكي  
والدنيا ان ضاقت في انتي براح  
وانا جنبك بالنظمه وارتاح  
وخناقنا ساعات بيكون راحة  
وخصامنا كثير بيكون تلكيك  
الأم مكان لسكون الروح  
وخصارمه قلبك طارح فيك  
- أيوة ياماما؟  
- عاوزة أفرح بيك.

## {هامش}

القهوة،

منه كثر الكتابة عنها / باخت

فيه حاجات زيادة مدحها لعنة

يارب هبنا قهوة تشبه حزننا

واوهبنا شخص أصم يسمعنا

وادينا قلب نبوحله ما يخونناش

وادينا حضه نروحله، فيساعنا

صديق شوارع ذكريات تايهيه

والحزن شاعر له هدوءه وحكمته

سألوا الكمان يا هل ترى بتحب ميه؟

ضاق - المكان - ما فضلش غيرها في رثته

اتنيت في حرب وخرجوا الاتنيق مقتوليه

وحضنها هربت منه، رجعت حضنته!

ميه اللي سلم للشتا المفتح  
طعم الحاجات الدافية في الليل والمطر  
تهدرك في كل العيرانيه مع جنتك  
البت كانت جنتك يا حبيب  
جنتها ليه ساحة ما كانت كرهنتك؟  
وازاى بتعمل مع سجايك بالونات  
بتسيبها تطلع للسما دخان  
البت مشيت وانت مت عشان  
دخنت نفسك في الصباح سرطان  
ومحطشت مع شرب السما في البحر  
والبحر مع كثر الغرق عطشان  
فبلاش تفكر كل ماء يرويك  
وبلاش تفكر كل حضه شاربك  
فكرت يومياً في كل الناس  
ونسيت تفكر في اللي فكر فيك  
في الليل مساحة اسمها " الأشف" "

كل الإغاني والصور والذكريات

كل الحاجات بتطلب منه ذكرى الحاجات

ف الليل وكل امراحيه نايميه

هتتم جنبك لحظة تسوى ساعات

أنا كتفي ممك تلمسه يشووك خياب

أنا قلبي ممك تعصره ينزل بنات

لكه لسوء الحظ أو حسنه

ماقتش عارف أنسى دي بالذات

وبانها كوردات " عمر خيرت "

ريحة الشوارع وقت فجرية

كل البنات هي وهي البنات كلهم

وانت اللي بتروحلهم مايطلعوش هي!

طب ايه يا عم الشتا؟؟؟؟

أنا تحت عيني اتهدى منه كتر ماخيت

فكرت فيها ضحكك.. ضحكك فجأة بكيت

ليه الشوارع كلهم قاصديه

يفكرونى بالي مش فاضليه؟

والقهوة كرسى الاعتراف بالذنب

تشرب تقول كل اللي سابك ميه  
ليه الشنا والبحر اتنيه صحاب اتنيه  
طب ليه ف كل البلونات حكايات  
فتحت عيني جدي غمض مات  
وكبرت بيتنا لم عفشه وهج  
والدي ما حاشه بس شوقته " يا حاح "

وايديه ف خدي ختم نسر كبير  
أمي اللي شيلت ف حضنها جناحات  
وبقيت ف طيبة كل حضه باطير  
وصحابي دفتر خدت صفة ف مطلعه  
منهم ثلاثة " توأميه وضمير "

شكراً لإن الشنا / عرانا ما فضحناش  
شكراً لإن الذكريات مماتش  
أكبر دليل عندك أنا  
أنا لسه اهو ماتستش  
شكراً ل بكة طيه ف ديك التوب  
شكراً طهرة تبكنا ننشف



تعرف يا عم الشتا ولا بلاش تعرف  
في مثل هذا الوقت في كل عام يفوت  
باحيا واموت مرات وف كل ما احيا باموت  
وعملت منك ذكريات وحنينه  
والقهوة سادة ووشعها منطوي  
وعملت عالم من خيال ألوان  
وعملت صورة بألف حس وصوت  
وقنحت صدرى للغياب شبائيك  
دخل الحمام عشت ودار له بيوت  
لا البنت راجعة ولا الكلام يكفيك  
ولا ضحكى باكي ولا العياط مبسوط.

ل داوود عبد السيد عن فيلم " رسايل البحر " ، للدخان  
بصفته وشخصه ، ولآسر ياسين وبسمة ومحمد لطفي مع  
حفظ الأدوار ، لـ cilantro جامعة الدول ، ولموسيقى  
ياسر عبد الرحمن باعتبارها نصوص شعرية

باكتب لكم

عن بيت قديم مادخلتهوش

ماعرفش مين ساكن هنا؟

سنوات بافوت

بالمح خيوط العنكبوت بتحاوط الأركان بخفه وانتصار

ماعرفش مين ساكن هنا؟

لكن طيور كانت بتهرب من عشوشها

لحد عنده وتنطلق

يشرق نهار

بيطير حمام من فوق سطوح البيت

ويطلع للسماء

ينزل بسرعة حمام جديد بدل اللي طار

ما عرفش مين ساكن هنا؟

يمكن عجوزة بتعبر التمانين

وتحكي بلطف للأحفاد

حكاوي السندباد

يمكن محارب طار دراعه ف عز وهج الحرب

فاستسلم بسرعة للنيشان والموت

يمكن غفير

وصوه صحاب البيت يتابعه ف وقت ما يهاجروا

أو يمكن مجرد بيت قديم على ناصية أجمل من لقا البحرين

وحب اتنين

يمكن؟

ما عرفش مين ساكن هنا؟

بس الحقيقة كل شيء بييجيني يومياً هنا

كل شيء

صوت الكناريا وهي بتقيم المراسم كل حين

وبتدهن البيت بالغنا واللحن والموال

شكل الشجر لحظة ما ينخلع ف المسا اخر قميص / زي

العريس

بلكونة بالحنية دي

لازم تكون قامت عليها قصة الحب الأخيرة

لازم يكون عيل مصاب بالحب قرب من هنا

شباك ايديه فوق الغصون علشان يبوسها فانتنى واختل

روح مصاب بالحب وبكسر الدراع

لكنه زاد شوقاً

وعمره ماقل

بارتاح هنا ما عرفش ليه

وكإني قاعد في الخلا مع كوخ قديم

موجوع ياهذا البيت أظن

وللأسف

كل اللي وجعه داخلي ببيان سليم

كل اللي عدوا من هنا عدوا

ولا هدوا

ماشافوش ملامحك زي عيني ما بصتك

خايف /

كإنك طفل عايش ف الجنوب

بیمارس التحطیب لأول يوم وآخر روح

مبسوط /

كإنك قلب صیاد من بلدنا

لما يرجع ف المسا شایل هدوم العید برزق الإید

بردان /

كإن الفجر بيخطي بهدوء من تحت عقب الباب

ويلمس خدها

مكسوف /

عشان بتحبها

بصيت وخننت ببصيرة ويعمى

مين اللي كان ساكن هنا؟!!

قالوا الجيران:

من يوم ما عزلنا لها ما ملحنا شيء غير الطيور

كل اللي يمكن نعرفه

ان المكان شايل ف قلبه الذكريات لسنين

بيان حزين

ويان يضحك ف الصباح

قال حد منهم :

بس انا بلمح هنا عيل بيجري كل يوم

باسمع عيال بيعيطوا وبيهتفوا

انا الأول . . لأنا / أنا الأول . . أنا

والثاني قال :

اما انا باسمع هنا صوت الموسيقى كل يوم

يمكن موسيقي قديمة م القرن اللي فات

أو يمكن يكون صوت الستائر

بعد ماتقابل نسايم بحر هايج ف الخريف

والثالثة قالت :

ربما فضلّ أصحاب البيت بعادهم عن هنا

أو فضلوا الموت البطيء

ما عرفش ليه كل الطرق بتؤدي م الشارع لحجر البيت  
بكيت، وكتبت بالطباشير علي الجدران  
" كان في هنا أشخاص بتحلم زينا "

وكتبت برضه

" ملك مين ما عرفش؟

ملك شيخ؟ مومس؟ صبي؟

ملك مسلم؟ قبطي؟ يهودي؟

مش هتفرق .

كل اللي عارفه ان هذا الجزء أصبح ملكنا "

ولمصلحة حبي الكبير للبيت

لمصلحة هذا الغرام الملهب بيننا

أفضل كده ما عرفش

ما عرفش مين ساكن هنا .



باكتب لكم عنه

مرّت سنة

ولسه بيبجي يومياً إلي المطعم

ينادي بسرعة ع الجرسون

ويطلب قهوتين سادة

يُص من الإزاع الشارع الخلفي

ويستناها تيجي بالساعات

زي اللي واقف على رصيف القطر مستني

والقطر فات .

زَعَق ف وش الحاضرين

لحظة ماتهموه بالجنون

قال لهم : إزاي ماجتشِ ، والروج معلّم لونه فـ الفنجان ؟ !

حتى شموّوا

هتلاقوا بارفانها الباريسي

لسه جايب آخر الشارع . . إزاي ماجتش؟

طب مين اللي شغل أغنيات (مارسيل خليفة)

وفضل معايا بنرقص امبارح لواحدة الصُبح؟!

وازاي اختفت نُص علبة سجايري

مع إني مادختش

إيه . . عفريت شربها!!

كل الحكاية انكم خايفين

رافضين تشوفوا المشهد الكامل

لواحدة بتقابل حبيبها

كان كل يوم يعمل كده

وكانه من فرط القلق رافض يخونها

كنت بحلم يوم اطوله واسأله :

كان إيه شعورك

وانت بتعدّي الطريق دلوقتي وياها

بدونها؟!!! .

عند بآترينة بوتيك

كان كل يوم يبجي ويبصع الأسعار

ظابط ذراعاه الشمال على زاوية قائمة

وكانها حطت إيديها الطيبة ف إيديه

ماحزنش على نفسه ف ساعتها

بس فعلاً

شفت كل المانيكانات حزنت عليه .

عند بيتها

كان يياخذ وضع متداري

عشان يعرف يبوسها

وعشان يجوز أمها

تطلع إلي البلكونه نفس الوقت

بصيت له يومها من بعيد واحترت

قربت اهلوس

قربت اصدق إنها

ماباعتش بيتها قبل ماتسافر بساعة

قربت اصدق إنها كانت كما بيحكي لي فعلاً

كل يوم تبعت جواب مقفول لبرنامج المفضل ف الإذاعة

الحقيقة

هي سافرت

بس سابت واحدة تشبهها

واحدة ساكنة ف ذكرياته وبس

أما هو

هو تغريد العصافير الحزينة ف القفص

شبه التماثل للشفا من شخص مش عيان

هو

سعي الاخطاوي للوصول للامكان

هو اللي ممكن يقلب الواقع برفضه

كل مايواصل متابعة فيلمه بجنونه ودأبه

أما انا

قررت اكون شاعر نبيل جداً

بطلت اراقبه .

ف الدور الثاني من الدنيا

ف الدور الأرضي من السماوات

كان فيه واحد ميت عايش

بيتابع ناس عايشين أموات

طلع الموضوع من فوق أحلى

من فوق بتبان كل الأشياء

أبسط

أسهل

وبدون تعقيد

موقف بيكون كله بيبكي

وانت لوحدك مبسوط وسعيد

كإنك واقف تتفرج على حوض السمك اللي ف بيتكم

وكإنك بالونة هيليوم

فلتت من ايد عيل بشویش

من فوق بتبان كل الصراعات

أبعد من فكرة أكل العيش

من فوق برضه

بتبان الدنيا صنية شاي

والناس حاوطوها بـ سيب وانا سيب

الراحل منها يقوم بدري

والباقي يحاسب ع المشاريب

والفاضل منها يادوب سيرة

وحسن مسيرة وتهريج ونحيب

الفكرة انك من فوق دائماً

بتشوف احسن

والساكن ف الدور التالت

بیشوف العربيات حشرات

ويشوفكم لامؤاخذه يا حضرات

كما سرب النمل ف شق جدار

من فوق الشيء واضح للعين

فيا اما الجنة يا اما النار

طلع الموضوع من فوق اثبات

ان اللي بيحصل تحت هزار.



مشهد ٥  
خروج عن النص

موسيقى  
يحيى أ.ه. اسكندريلا

”كان وقتها المخرج يثبت الشهر.. والصورة أوضع من زمان بكثير”

عن التحرير

عن الشمس اللي خرجت من جيوب الناس

عن الفجر اللي نام ف محطة الركاب

بيجمع كل قلب اتساب

ويجمع كل ثمرة خوخ بتشرب من مبيد سرطان

وكل شيطان ماجاتلوش فرصة يبقى ملاك

تسمي الثورة إيه ف الكبت؟

اسمها " ندى الشباك"

تسمي الثورة ايه ف الشوق؟

اسمها " هنا ف هناك "

واسمها مرور الضي م الاسلاك

واسمها حاجات تانية

تكونلك لو ماكونش معاك

صباح الخير علي التحرير

قمر علي شكل قرص كبير

ألف خواجات وكتيبة

وشرية

أساتذة عربي ومحامين وحبية

بتوع حمص وهلية

مشايخ شائلة نور الله ف عمتهم

عيال جاين بعمتهم

يشوفوا النور من المنبع

يبوسوا الأرض من مركز هتاف الأرض

ويصلوا بعيون خوفهم من المجهول

صباح الخير

علي الخوف اللي ف القاتل من العند للي ف المقتول

وع الأرغول

وع الناي اللي بات سكران وقام طاهر

بيعمل نفسه متظاهر

ويعزف والجميع كورس

ويهتف والجميع يسمع

هنا " حيث ان نقص واحد نقوم نجمع "

ولو قل العدد بيزيد

ميدان بيعد أمواته من المواليد

ومصر بتنفجر ثورة ف كل وريد

"هنا المخرج مثبت فأور علي ضحلة فريد الريب. ووخان السيجار الكبر كثير  
من نظرة القاضي"

كان شاب م الأرياف منزل جسمه بره القطر

ينظر بعينه الطيبة للنور

شاي ف جيه بنت من عمره

وجاي يسأل عن أبوه اللي اتقتل عابر

وعاش صبار ومات صابر  
ودلّوه الشباب علي أول التحرير  
وطن فعلي

بلد بضمير

ومر ماين ألوف الناس

كخيط دخان بيدخل للرئة فجأة!

”رئيس الجمهورية جبان.. بيقتل نرجة السكان.. ويبيع الرقيق منشوش“

يمر هتاف ماين بتتين

يبصوا لبعض باستغراب

واي اتنين تمر الثورة بينهما / يبقوا أصحاب

واي اتنين كتافهم تسند ف الخوف

يبقوا اقوي م القناص وم المولوتوف

يبص العسكري بعنيه من الخوذه اللي على راسه

يشوف صاحبه اللي ف الشارع

يفقد باقي انفاسه

وبيموت والميدان يعلن حداد ممتد

”نروح الجمعة ياميخائيل بلاش الحد“

”نروح الجمعة يا ابانوب وبرضه الحد“

كنيستك ف الميدان أوضح

صلاتك ف الميدان بستان

يعدّوا وخلف منهم شيخ بيقل ضلفة الدكان

وطن بيصب بالكامل ف حضن ميدان

”هنا القاضي نظر بعينه إلهي الشهر وخبى الصفة ف الدستور وقال اللهم“

عن الأم اللي مات منها اللي كان منها

عينها النور ف وقت ماقتلوا نور عينها

بتقعد ع الرصيف تحسب برود الوقت

وتستني السما تفتح عن العدل اللي تستناه

تبص وبدلة الضباط بتظهر من بعيد جداً

وتبدأ بعدهم صفحة ف كتاب الصبر والمأساة

تلاقي القاضي بيغادر

وتسمع طرف لحن حزين

وطيارة الرئيس بتطير

وتعظيم السلام ويّاه

..سيناريو بديل ..

شباب طالع بروح الجيل

يوس علي كتف أهالينا

غلطنا منّا فينا

بنكتب فوق جبين الليل بأن الحل ف الطلبة

وان الثورة ليها فصول ولم تخلص

وفاضل فيها فصل أخير

من التحرير

## خروج

ايه اللي وداهم هناك؟

اللي وداهم سعادتك  
حزنهم قدام سعادتك  
وانت نايم زي عادتك  
محك المليون معاك

اللي طالبه من جنابك  
سيب لعم الحج نابك  
طق وحدك من جنابك  
واترك اللقطة لسواك



اللي طالبه بلاش تعيهم  
يكفي ان الموت تابعهم  
هما ميزتك وانت عيهم  
مرضوا هما عشان شفاك

راحوا يحكوا مين قتلنا  
يذكروا يوم ما اتقتلنا  
لما شافوا الموت اتالنا  
قررنا يموتوا فداك

ده اللي وداهم هناك

## {هامش}

انا اسمي محمد محمود

المهنة : قتيك مشكوك في طريقة موته

وفصيلة دمي : بارود

اعرف أشخاص بالاسم

مروا جماعة بعلب الكشري واغاثي امام

واختلفوا مع الحاكم علي مفهوم الامه العام

وافترضوا الأرض

بالطول والعرض

وانطلقت متريكا حزينة قبل الأحداث بدقائق

انا اسمي محمد محمود

باشتكي من جرح في صدري بطول الشارع

وبضيق في الشعب الهوائية من أثر الغاز

باشتكي من دم قديم يبسيل في الثوراة لحد الان من غير تحديد للمصدر

اختلفت روايات العسكرة من سبب الموت

وانمسحوا الشهداء من الذاكرة في غيباب القائم بالأعمال

وانقل الدفتر في حضوره

بعد ما وصلوا معاه لخلول " بخصوص الحافر ومكان دائم في المجلس

الباب اللي يجيلك منه الغاز - سده مجاز

واسند منهدك على اقرب حيط يشبهلك

الدولة خلاص ما بقتش في حاجة لشهدا جداد

ما بقتش في حاجة لاموات اهاليهم ياخدوا تذاكر حلا وعمرة

وشوارع تبقا باسميهم

الشارع لازم يتسمى باسم القناص

هو الطلقة اللي بتشرح عن الضهر بصوت مكتوم

هو الواحد وانت كتير

هو السيد وانت العبد

والشهر ده ضروري هيتفضل

علشان يرجع هذا الشارع لطبيعته

سات

خامل

يصلح مرور موكب

وليبي كتب الأدب الساخر فوق الرصيفان

انا اسمي محمد محمود

شاهد علي آخر عشوة ما بينه آتنيه اصحاب

شاهد علي آخر كوباية شاي

شاهد علي ناي مخروم حزناً مش لجك العزف

شاهد علي واحد مات منضاف بالحزف

شاهد علي نرف لآف ورير مع بعض

ازاي حولتوا الموت كونشيتو بهذا الشكل

اختلط الدم بطعم الأكل

واختلط الحابل بالنابل

انا بيعتف وهتافي قنابل

وبموت م الخوف مش م العسكر

لكه خايف ل يقول العسكر لحبيبتني ان انا قاتل

طب فيه قاتل بيوسج صدره لغاز مسموم وبيعتهف قدام الجرينوف

القاتل عنده ثقافة الخوف

القاتل أضعف م المولوتوف وبيهرج م اليفط البويا

والله انا خايف علي ابويا

انا جيت خايف ينكشف الشارع عك شرطي يواجه أختي

وتتموت فرحاً منه بصاته

جاي اسحب م الشرطي سياطه

اياك تنكر دم املتت..حتي ان شكيت

فما بالك لو كان املتت جارك والبيت في البيت

والباب في الباب

الموتي جميعاً كانوا شباب

ووشوش تفرح في حضور

فازاي تبعد في غيب

فتش في صدور الموتى واحد واحد

طلع اسماء السكاه واحد واحد

ازاي اصبحت سليل جاحد

فتش في صدورهم عه قهوة

واتنيش شيشة مع حلية حليب في الصبحية

فتش عه بنت جيران

فتش عه معني الانسا

عه اخر ماتش في ليل رمضان

عه اخر دعوه لأمه وهو بينزل ربنا يفتدها في وشك وتعود سالم

فتش في صدورهم عن ظالم عينته حكيم

واختلط القاتل بالقتول

الشرح يطول

والسيرة تبدأ مايتخلصه

العمر يمتد ماينقصه

والراوي هيطلح وهيعلك كل التفاصيل

القاتل بقا منه خوفه قتيل

والشارع فاضي الآن

طرور موكب

وليه كتب الأدب الساخر فوق الرصفاه

المصرية وفتي أحلام الريح

الأولة : حاسب

والثانية : وجعك

والثالثة : أبشر

الأولة : حاسب علي قلبك يامينا

في عسكري جه وراه

والثانية : وجعك بسيط دافي

ومالوش ف قولة آه

و الثالثة : أبشر ياعم

الموتة ف الميادين . . بتتحسب بصلاة

رصاصة قالت لمينا : ليه ماجتش يمينا

قال : لما اميل هاحيا ويموتوا ناس ثانيين

الطلقة أنثي وليها قلب وبتشعر

الطلقة شايقة وعارفه رايحة تضرب مين

شارع عمومي يامينا واحنا سكانك  
سكان حزاني شافوا الضحك وماضحكوش  
ضحكنا ف البيت اللي كان مفروش بأحزانك  
وعلينا دمين ايجار لسه ماتدفعوش

وقفت بهدوء الحكيم بصيت علي القناص  
مليته رقم البطاقة وقولتله اسمك  
كريم يامينا حتي كرمك ع الرصاص  
رصاصة مش لاقية السكن /  
سكنتها ف جسمك

عملت سيرتك حصيرتك ف اجتماع الشاي  
يكفيك يامينا انك انت مت موة ناي  
دمعك بياتي أصيل ودمعتك م الرست  
ونزفت خلص النيل في وقت ما خلصت



أنيت كإنك كمنجة وترها قاه منها  
كمنجة وقفت بتعزف والكل تاهمها  
فارس يعاتب مصر بالحب والنشأة  
لكنه ماعاتبهاش ع اللي أتاه منها

أرثيك يامين صحيح ولّا احسدك يالئيم!  
مشيت بدون أسئلة من غير لاسين ولا جيم  
لا سألت عن اعانات ولا قطن لاصابتك  
حييت تفارق فارقت

وقلت تمشي مشيت

اخترت وقت مناسب يا أيها العفريت  
بصيت عليك يومها كان الميدان واسع  
وكنت واقف كإنك فتحة جابت نور  
قناص بيشرب سيجارته ف شرفة ف التاسع  
ومصر فاتحة الزراير ف انتظار الدور

قلبك نزل ع الأرض عند مدرعة  
طلع لسانه وغازها قبل ماينداس  
النور سواد طالل م الجهات الأربعة  
والبرد نايم فريسة حُرقة الانفاس  
الموت بيعرف صحابه بالاسم والهيئة  
لو الميدان بيدور  
كانوا ماتوا نفس الناس  
أشهد بإنك مقاتل من طراز فارس  
أشهد بإنك نوارس في امتداد البحر  
وعنيك غُنا " اسكندريلا " ف الميدان العام  
باعوا العساكر ترابها بالرخيص يا صديق  
وانت ابن سوق عارف بلدنا تعمل كام

بِكَاي وباسم وقاسم للجراح خُبْزك  
وعنيك دموعها بسيطة لا تُثْري بالعين  
عرفت وقت الموت تموت بره حُجزك  
ودماك بتزرع كفوفك يا أخضر الكفين

أشهد بإنك يامينا

مُت وانت ارق

كان "جاهين" باكي و"نجم" بيتابع

"حداد فؤادك" يامينا

لم يبطل دق

علشان كده ياوديع / ياطيب الطلة

فضلت توسع لوحذك / والميدان يضيق.

وبقول لكم:

البحر أقرب من جميع الناس

والبحر بالنسبة لوحيد هو السكن

البحر مش ذنبه اللي عدوا من عليه رايعين لفين

وبين غروره وقسوة الماشيين فوقيه م المستحيل تلقى ارتباط

البحر بحر

لو شفت موجه بيرمي ورد للعشاق

أو كان بيرفع حاملة للطائرات

البحر بحر

كنت في عزلتي

باجي هنا ومعايا بعض حاجات

أقعد ووحيد ع الشط واستسلم لحزني والندى

ع البحر

أمي وهي خايفة عليّام الفرق الأكيد

قالوها من سنوات :

(إبنك هيغرق ، لأنه لما ينسحب بالموج بيخجل م النداء

وبيحترم صمته كده

خجله بيظهر غصب عنه ويلحقوه أول مايعرق

إبنك هيغرق)

وافتكروا من غير ماشوفها إنها

كانت بإيدها بتكتشف هل في خروم في المركبة أو لا

وبأنها كانت بتوصف للنوارس شكلي بالتحديد

ف ان غيبت عن عينهم ينادوا بسرعة للغطاس

ويلحقني إذا أمكن

ع البحر ، قعدت وفردت رجلها زي الأميرة

ماعرفش عنها

غير انها ساكنة ف طرف المدينة

طرفها الدفيان - أكيد -

وبإنها من أصل لبناني  
زي صاحبي ما قال لي عنها  
قال لي حاسب مش هينفع  
والحقيقة اني عارفك  
مش هتهدي

قلت له : لو كان بإيدي يا صديقي كنت أتوب

الغريبة لما كانت تتجه لبلادها وقت الصيف  
ماكانش يجرؤ قصف جوي  
يقلق الناس ف الجنوب

لما كانت تبسم كنت باصبح شخص ثاني  
شخص غير

زي راهب جوه دير  
والسنة دي شفتها ع البحر مرة واختفت

وبقول لكم :

ف البحر عزلة هو ما قصد هاش

والوحدة زي البحر زرقة بس غامقة

والبحر وحده هو أدري م الجميع بالسر

هو اللي كان بيكسر المركب بخفة

لجل اشوف أمني بتخشي الموج عليا واحس بعطفها

وهو اللي كان بيصورّ البنت ف خيالي وردة صابحة

و كنت بنجل منه جداً

فلا أحاول قطفها

البحر . . . . . بحر .

باكتب لكم

بدمع السيدة اللي اهتز خوفها بين حروفها

وهي قدام المقام

" سدّد خطانا للندي ياسيدي "

باخشي الاغاني الميته والليل طويل

خايقة ماموتش زي أمي عند عتب البيت

والبيت

اذا شاف ميته عند العتب

يسحب ايديه ويشده للأوضه أم أكره لحاس

ويسيبه على كرسيه وحيد

ترفع ايديها السيدة

والطفلة ماسكة ف طرف جلبابها

ممکن تقف سنوات هنا

لو قررت تذكر جميع اللي رحلوا ضمن احبابها



تدمع عيون السيدة عند المقام

(مش عارفة انام ،

ازاي اغمض والعيال نايمين بدون عشوة الليلا دي

والسنة دي طاحنه فينا جفاف)

خايفة م الآتي الغريب

من كل شيء لاشيء

وابقوا اسألوا اللي انتظر ليه لما فكرّ خاف؟

ليه ماتبكي الطفلة قدام المقام تنزل دموعها بين عينيا تبلني؟

ليه لما تسند كفّها فوق الخشب بتمسّني؟

واقف هناك جنب المقام وعلاقتي بالمقامات طفيفة

كانوا الرعايا يبسألوا فين الخليفة

والصبايا يمسحوا دموع أمهاتهم

كنت بسأل ليه فؤاد حداد ماسابش خطواته هنا عند المقام؟

خاصة ان شاعر زبي مثلاً  
مش هيقدر يسرد القصة لآخرها  
وان سردها ربما تتحول القصة لنقيضها عن جهالة  
آسف هافارق قصبتك  
وهاروح واسيبك تذر في دمعك وخوفك ف المقام  
وحدك ياخاله

الشعر خارج من هنا  
حتى ان قصدت تكون قصديتي مجردة  
حتى ان صبحت ف نظرة الأصحاب  
أرستقراطي جداً ف القصيدة  
الشعر خارج من هنا بحاجات جديدة  
والفرق بس ف نظرتك للمشهدية البيئة  
علشان كده فلتسمعوا

هنا

وبدون ماتقلق

رفعت ايديها السيدة عند المقام

وعينيها شايلة الورد من وسط الفازات وبتنطلق للنور

تشعلق البنت الجميلة ف طرف جلبابها

توهب ايديها السيدة للبنت

تضحك

تفتكر أول مادخلت سينما بايدين أمها

أول ماراحت فصلها جنب أمها

واثق بأن اللحظة دي حصلت هنا

وانتوا أدري من غريب زيي عن المدن البعيدة وشخص

جاهل بالمقام

انتوا أدري من مجرد طفل بالغ قرر يغيب عن كل شيء

ويذكر الأشياء كما شافها هناك

علشان كده فلتسمعوا

الشعر خارج من هنا

مش من هناك

من غرسة الأطفال ف وحل ف حي عشوائي

من فرض الحصار العسكري خوف التلاقي

من فرحة العيل ف عز الليل بلبس العيد

من ثلاث ستات يبحكوا عن حياتهم عند عتب البيت

والبيت إذا شاف ميتة عند العتب

يسحب ايديه ويشده للأوضة أم أكرة نحاس

ويسيبه على كرسيه وحيد.

## {هامش}

احنا الصاحبيہ لنهاية الليل

احنا اللي جراحنا تعهد الحيل

ربنا يكفيك شر التطبيق والقعدة لوحدة بتفكر

الليل ملعون بيطارد فيك ويطول أكثر م العادة

الليل فنجاه " وحدة " زيادة

تتطفي روحك زي سجارة ماتت على طرف السجادة

ربنا يكفيك شر الحكايات بالذات لو كانت مايتقالش

ربنا يكفيك شر البدايات بالذات لو كانت مايتكملش

ربنا يكفيك شر الاحزان بالذات لما يتحول ألس

ربنا يكفيك شر اللي ماقالش

عه هم يبدأ آخر الليل.

انسان آلي

واقف يتفرج علي عمر سريع بيعدي

معدن مركون ويبستخدام

فلا منه سليم ولا منه مصدي

انسان آلي لو هزيتة

ممکن يغرق هذا العالم

لو هزيتة

تنزل منه كمنجات ، وبنات ، وشوارع ، وحانات ،

وفؤاد حداد ، ومساكن شعبية

انسان آلي

يعرف امتي يعيط تحديدأ

امتي يسيب نفسه لشارع

انوار عمدانه بتفضيح مساكينه

وبيوته اما بتعرق بيزيلها الحي

بيداري بجسمه المعدن قلبه الني

أوقات يكون شجرة

يقصدها العشاق والغربا وبنات الليل

شجرة بتقعد ع القهوة وبتشرب شاي

شجرة اتخرمت من أثر الحزن فاتقلبت ناي

وساعات يكون وردة بلاستيك

بتراقب بوسة حميمة ف بير السلم

لاتنين عشاق دمعهم سخنهم وايديهم باردة

وردة بلاستيك

لكن لها روح . . علشان آمنت انها وردة

انسان آلي

مؤمن بالله حد التفكير ف وجود الله

مؤمن ان الشمس بتشرق بيضا

وبتصفر بفعل صحاري الغربة والحقد البشري

مؤمن

ان الدخان بيزيد كل مانبعد عن مجرى النهر

كل ماينسيب اجسامنا مساءً ف الخمارة

ونروح للبيت اجسام من غير ارواح

دخان ، دخان بيزيد

دخان ف البيت ، ف الشارع ، ف الفتارين ، ف عيون

الناس

دخان بيطل من الحواديت

دخان ف الشعر ، ع القهوة ، ف الميادين ، علي نمر

العربيات

دخان ف الروح ، ف الاغنيات

دخان ف السوق ، ف البحر

دخان ف الصحرا



ف الموت دخان بنقول عنه بياض الغامض

ف الليل دخان بنقول عنه بياض الاسود

ف النور دخان بنقول عنه بياض التأويل

لو كان نرسيس ركز حبة

كان شاف الدخان طالع منه

كان فكّر ميت مرة قبل ما يُعجب بملاحه

كل الأساطير دخان

دخان أبيض / للروح

أسود / للعتمة

أزرق / للكدمة

أصفر / للصدمة

أحمر / للطمة

أخضر / للشعر

علي قد ماتفهم ألوانك

علي قد ماتصنع دخانك

فبتعجب ليه لما باقولك اننا اموات

وبتعجب ليه لما بقولك اننا ادوات

وبتعجب ليه بس حببتي

لو تحضنتي يوجعها حديد جسمي

لو كنا بنختار علي كيفنا

كنا بقينا جميعاً ازواج صالحين

أو شعرا بتوصل قصايدهم للناس

أو ثوار صنعوا بلادهم بعد ماماتوا

لو كنا بنختار علي كيفنا

كنا عرفنا

ازاي نضحك . . . من غير مانعيط .

من أجل ده

باكتب لكم

عن أغنياتنا وفرحنا

عن خوف قديم وهروب جديد

عن ليل طويل اسمه الحياة

عن برد أسرع من دخولنا للدولاب

وخروجنا منه بشيء باسميه الدفا

عن أمهاتنا عند باب النهر ييملوا جراتهم حنان مكتوم

ويقضوا الليل سكون على طرف شرفاتهم

بيونسوا الكروان ويلملموا رفاتهم

ويضحكوا لله

هذا اللي عجز سميناه الموت

كان اسمه من سنوات

حياة

من أجل ده وف عزلتي

باكتب لكم عن قصتي

وبسبب ايدى ع الأكر مستني واحد منكم يدخل عليا  
بالكتاب

هل قالوا عن بعدي اني مُت؟

هل قالوا غاب؟

هل قالوا بطل شعر؟

هل موتوا أبطال قصايدى كلهم؟

أم فعلوا ايه؟

وبقول لكم :

الشعر لعنة ممتعة

وكان صوت السيمفونية أعلى دائماً

ووشوشنا وقت ما ينتهي صوت الآلات

تتلاشى وياها

م البسيط بنهج ، بقلوع المراكب ننطلق

قاصدين أمل يمكن

قاصدين متاهة

ننكسر نقوى ونقوى ننكسر

احنا أضعف مخلوقات الأرض / أقواها

كل من مر ف حياتي خد مكان ف السيمفونية

حتى لو أبسط كثير من إنه يحتل المكان

قلت :

باسم كل المهزومين بالأمكنة قررت أهاجر

ارمي روعي للشواطيء والشوارع

اسمي : اسمي

جسمي : هالة من قلق ودموع

قلت أهاجر

باسم أنصاف البشر ف المولد الدنيا

أعلن الأسماء وبالتفصيل

نوع بيوتهم ، لون وشوشهم ، فولكلورهم ، حلمهم

عن ناس بتخرج م الحياة

أول ما تخرج للحياة

قلت أهاجر

لجل ما أجمع أغنيات من لحم أهلي

من مراكب ولعت ف البحر

منتظرة الحقيقة واختفت

قلت اهاجر

لجل ما اخرج م الدواير للصدى

واصنع بداية تليق براحل م الجنوب للبحر

قلت ادون ف الكتاب اخر آيات الروح

واعزف لوحدي ع الجبل

يسمعني عابر أو ميسمعنيش ماتفرقش . . . عزفت

بانزف لوحدي أو معاهم مش هتفرق

اسمي ف الحاليتين . . . . نزفت

بالتشابه قلت اجازف باختلافي

فاختلفت

يبقى مش حلم اللي شفته  
لما كان طيف المسيح يشق نهر ف أرض بور  
والحمام بيفرم الأبراج لحجر الناس  
كانت أغاني ملهمة  
بترتب العصافير على الصبح الجديد  
والموج بيغسل هم عشاقه  
يبقى مش حلم اللي شفته  
لما كانت قوقعة تشبه مدينة بحملها  
والسر أوسع من غرور البحر ف النوة  
كانت بتسكن حضن طفلين اترموا ف البحر  
مع انهم ما بيعرفوش العوم  
قال لها : ما اعرفش اسمك  
فابتدت ترقص  
كان غرور الموج بيخشى رقصها  
وبيحترم فن اختيار الاسم بالرقصة



رقصت كإن الليل يشرب من قناية صبح ع الشباك

والصوت بيخرج من لسان أخرس

يطيح بالساكيتين

قال لها : ما اعرفش اسمك

بس عارفك

تفتكر للدنيا كام مخرج هناك

ما تقولش واحد

كلنا مش شكل بعض عشان نقول نفس الأسامي

كلنا مش شكل بعض عشان نغني

تفتكر ف اليأس كام بوابة تصلح للتمني

جايز ثلاثة (ليل وخوف وسكون)

- تفتكر.....؟

- جايز

قلت جايز

بس سييني للمشاهدة  
سييني للصلصال ياخدني واكتشف أكثر بعيني  
سييني وحدي ف عزلتي  
سييلي النوارس والطريق للبحر  
فكرني بامي والأغاني البكر قبل مانصطدم بالليل .  
وبلاش تقول لي  
ان اهلي كلهم باعوا الصلة  
واستسلموا للبعد قاصدين البعاد  
بلاش تقول لي  
ان اقرب حاجة ليا  
هي أغرب حاجة عني  
وبلاش تقول لي ان صوتي نشاذ  
واسمحلي اغني

انا هافتكر كل اللي فاتني ف رحلتي

رحلة العشرين محاولة

والسبعناشر نظر

هافتكر دخلة أبويا بالجوافة والفراولة

والفزع م الجي

تزيياً عجسته

لما يدخل عند باب الحي

صحابي ف شارع الفقرا

وليل إبريل

إذا يكذب علينا بحلم ضي

هافتكر تونس

وهي بتعترف بالشعر ف حضوري وف غياي

هافتكر ياسمين

صبية تونس العذرا

وضحكتهما البتول

هافتكر كل الإناث اللي احترمت القرب منهم واعترفنا  
بالتعري

هافتكر بلدي اللي واقفة ع القنال

بتنشر النور ع الحبال

وبتنشي بالسسمية

هافتكر اهلي وهما بيكتبوا الجوابات

وبيعبتوها بالحمام الزاجل الميت

هافتكر (بيريهان)

وهي بتتفق ويا المطر على صفقة كسبانة

لو هي مرت من هنا ينزل يغرق شارع الفوانيس

وقصاد كده

هي هتسمحله يلامس جزء منها

لما ييجي الريح ف مارس كل عام

يلمس حواف الجيبة وياخذها

ويبان صهيل النور علي جناح السما

هافتكر كل القهاوي اللي انسحبت بخفة منها

وسيتها للذكريات والفحم

مؤمن بإن الماضي آت

والذكرى شحم ولحم

علشان كده

من عزلتي وانا وسطكم

باكتب لكم:

الشعر لعنة ممتعة

والشاعر الموهوب يكتب جهله باستمتاع

الحب وردة ونبتت على طرف بلكونة قتيل

دبّت ف روحه الروح فعاود باندفاع

الشعر/ فكرة أوسع من جراحه وبهجته

واخر مايشغل نبي

الصدق م الأتباع.

## {هامش}

خدها قاحدة:

أي واحد جاب فراشة م الجنية وخطها ف البرطمان

ثم فكر انه يحافظ عليها...

ذنيه فيها

دمها الألوان هي فضل شيء يطارد

أصل برضه / مثل طريقة عشاق يصونها!

هو ممكن عجب لونها

قال يجيبها تموت قصاده بالبطيخ

واقا مات هو عيط

والجميع حسوه بريء

شالها يابيه ثم خدها

للها وهاها تاني

نزلت الألوان بتنزف

برتقاني ع الطريق!

قصة الحب الكبيرة،،  
صورك السيلفي الأخيرة،،  
اتصلك بالليل بضايقتك  
تزعجوا / تفضونها سيرة  
انت طيب  
بس غامض  
هي حائزة حاجات كثيرة  
وانت ايه غير " شكركم"  
مع حياة منطقتها بيرة!  
شك أومنتك  
لونه هدمك  
ذكرياتك  
نقطة الصفر في حياتك  
السياسة  
والأغاني  
والجوامع  
الاضاءة الخافتة والمزينا وانت،،

- اعمل ايه لو توحشيني؟
- انسى واعرف واحدة ثانية
- بس انا شايلك ف عيني
- حظنا نبعد، دي دنيا!
- انتي قصديك تقتليني
- انت ميت كل ثانية

#### المحطات البعيدة

شئمة السفر اللي فيها ريحة الناس والشوارع  
جلدك اللي مسامحه شايله  
نقطة منه عرق اللي راجع  
الحياة رخمة وكثيية  
بس حلوة وليها معنى  
احنا باب ندخل ف نخرج  
والجميع شدة ورزحنا  
احنا بالفعل اتخدعنا!



كنت واقف والشوارع ليك ووحدّة

كان صبحاي كلهم ناحوا لبيوتهم

كنت وحدي أو معاها

أو..

معاها وكنت وحدي

كلّمتني عن قمر ساكن سماها

واقما طست إيدي فجأة

تابع القمر المفاجأة

خلّى نور الفجر يتأخر شوية

ثم غابت

ثم رجعت

ثم دابت ييه إيديا

واتشفّت بّاتي وحدي أو معاها

أو..

معاها

وكنت وحدي

الطبيب النفسي ممكنه

ينصحك ويعزّ فيك

بس مش ممكن يقرر

اللي غابوا يعودوا ليك

واكتئابك

رد بابك

سببت كل الناس وخيت

واللي سابك اسمه سابك

انت عمرك يوم ما سببت

قهوة تاني

وانسحابك للصور علشان تعاني

ناس كتير ف الصورة مشيوا

وانت مجني عليه وجاني

تكتشف إنك كإناك كنت منك توهمت فيك

ثم تفهم إن بكره باب وأكره هيجي بيك

وان خوفك لو يشوفك عمره ما هيزهق يجيك!

- طب وأبويا؟

- برحمه ربك ياخويا، شاك كثير وارتاح فسيبه

- طب وهي؟

- هي باحت واللي باح ياخذ نصيبه

كان ساحتها قلبي واقف والزمان ثابت مكانه

بكره فيه كام شيء، كويس يستحق اعيشه عشانه

طفل ممكن شبعني جداً

أو زيارة عائلية

أو مطر هيبك روجي

يمسح العفرة اللي قيا

أو ثلاثة أصحاب ف مصيف

يحقوا صباحي الصغير

يقنعوني بشيء، متريف

أو يراهنوني بغياهم

وأما بالكسب ما يغيبوش

فيه ف بكره شيء حقيقي

مستحيل بالخوف ييوش

بالقياس

فيه ف حياتنا يا ما ناس

موتونا بحب زائف

حب آخره يكون كلام فوق الشفايف

لنقونا بانهم ماسكيه ايرينا

يعشقونا ف سجننا مقفول علينا

واقا تعطل حاجة فينا

يسحبونا مع الضمان

كلنا يا صديقي أصلاً

كالفراشة ف برطمان.

{هامش}

ضروري

كادر واحد / " ليل داخلي . مستشفى "

أهلك واقفين قدام الباب

وممرض واقف عند دولاب

بيحضر حقنة بكل هدوء

خالك بيتابع بالتليفون

وأبوك بيرتل م القرءان - سورة الانسان

وبيدعي لأمك تبقى تمام

ف الكادر يبان منظر حمام وريسبشان واقف فيه شخصين

ف الخلفية صورة الرئيس واقف متحنط بين علمين

وف اخر الطريقة ثلاث ستات

بيجيوا حاجات ويودوا حاجات

وف وقت معين وف ثانية

خرج الدكتور بشهادة زور

ان انت بتضحك للدنيا

مشهد اتنين / " نهار خارجي . مدرسة "

مس نادية جلال

واقفة بتشرح / قدامها عيال

وانت ما بينهم قاعد محتاس

(اتفضل قوم ، جاوب علطول)

تتلخبط وقت ماتيجي تقول

يضحك واحد من اخر الفصل

تُخرج جداً وتشيل جواك

احراجك هو الباقي معاك

من طفل قديم كان يشبه ليك

تعرف معاليك !

كان شكلك أبسط من دلوقت

غيرك الوقت

بدلك المشهد والتفاصيل

والفاضل منك نص قبيح

دايماً بيغوز على نص جميل

مشهد ثلاثة / " ليل خارجي . النيل "

انت وهي وبتاعة الورد  
حضنها دافي وبينشع برد  
والناس محشودة بفعل الجرد  
بتقرب منها وهي بعيد  
بيان ف الكادر اتنين ظباط  
ويبان بالصوت تهريج وعياط  
وبطاطا بتلبس بالطوشياط  
وبتدفن روحها بدون أسباب  
واقف قدامها ايديك ع الباب  
وعنيك ع الشارع والماشين  
خايف من مين ؟ خايف على مين ؟  
كلها كام يوم ماتكونش معاك  
وتكون مع غيرك عند النيل  
هي وهو وبتاعة الورد  
حضنها دافي وبينشع برد  
والناس محشودة بفعل الجرد  
بيقرب منها وهي بعيد

مشهد أربعة " ليل داخلي منزل "

شكلك عجزت !

ما بقيتش خلاص عارف ترتاح  
مشروع طائر باقي منه جناح  
ومعاك أسرة بتعرف ترضيك  
وتعذب فيك

ومعاك أولاد شبهك بجنون  
ف المنظر اه مش ف المضمون  
ف الاوضة مرآة بحجم عنيك  
وهدوم احلامك واسعة عليك  
تضحك والشيب بيعاكس فيك  
والدنيا بتلعب بيك طاولة  
فاضل ف الروح اخر جولة  
فاضل من كل الماضي حاجات  
شارع وبنات مجاذيب وذوات  
وازايز خمرة وصحبة سوء  
وتاريخ مسروق



واغانني كثير مالهاش اصحاب  
الماضي بعيد و كانه سراب  
والجاي سراب هيكون ماضي  
فـ يدور " زميلكك " ع الفاضي

مشهد خمسة " ليل داخلي . مستشفى "

أهلك واقفين قدام الباب

وممرض واقف عند دولاب

بيحضّر حقنة بكل هدوء

بتك بتتابع بالتليفون

وأبنتك بيرتلّم القرءان - سورة الانسان

وبيدعي عشانك تبقى تمام

ف الكادر بيان منظر حمام وريسبشان واقف فيه شخصين

ف الخلفية صورة الرئيس واقف متحنّط بين علمين

وف اخر الطريقة ثلاث ستات

بيجيبوا حاجات ويودوا حاجات

وف وقت معين وف ثانية

خرج الدكتور مهزوم يقول

ان انت بتخرج م الدنيا .










قَالَ لِي: الْقُرْبُ الَّذِي تَعْرِفُهُ مَسَافَةٌ، وَالْبَعْدُ  
الَّذِي تَعْرِفُهُ مَسَافَةٌ، وَأَنَا الْقَرِيبُ الْبَعِيدُ بِلَا مَسَافَةَ.

النَّفَرِي

Bibliotheca Alexandrina



1240138

دار  
المعروف

للنشر والتوزيع

خلافاً لـ